

واحد كماله

اليوم ساخر



خالد بيومي

واحد كماله

ألبوم ساخر

خالد بيومي

غلاف أيمن القاضي

مراجعة ابتسام أمين

تصميمات Art Design

عندما يُفلس الكاتب فإنه يبحث في دفاتره القديمة عن (فكرةٍ ما) قد تصلح لقصةٍ أو (كلمةٍ ما) بقليلٍ من الفدلكه قد تغدو قولاً ماثوراً ..

وأنا ككاتبٍ أولاً ، وكساخرٍ ثانياً ، وكبيومي قبل كل ذلك ، بحثت ونقّبت ودورت واتنططت وعملت شقليات فلم أجد غير القصاصات والأقاويل والحواديت والشخبطات القديمة والتي آلمني أن أتركها وحيدة الأدرج فلملمت الصالح منها وجمعتها كلها كده على بعششششيها شاكب راكب ووضعتها في كتابٍ لذيذ ، بسيط ، جميل ، لطيف ، خفيف ، مفيد ، فوزي ..

ولأني أعلم أنكم - ك فنانز - مفلسون تماماً ومحلتكوش اللضا فلقد رفضت كل عروض دور النشر المغربية التي ألحّت علي أن أنشر كتابي لديها وقلت لنفسي يا واهه طنش خاهه الص .. دول فنانز غلابه و مش لاقين ياكلوا ويبدفعا اشترك البيدج بالعافيه .. نزلهم الكتاب الالكتروني وآهو كله بثوابه يا أبو نسب ..

وعلى هذا فإني آتيكم هذه المرة أيها القراء الأعزاء بكتابي الساخر الثالث (واحد كماله) والذي يضم بعض المقتطفات والأقصوصات و الحكايات و حبة مقالات من كتاباي العظيمان اللذوذان (فانلة داخلية تتسع لعدة أشخاص) و (فيها لا مؤاخذه حاجه حلوة) و بحيث لن تجد أروع من هذا الكتاب مثال على العك الأدبي والخلطبيته وإنه حتى الأدب ممكن يتحط في رغييف ..

وأخيراً أتمنى أن تجدوا في هذا الكتاب تسليّةً طيبةً لأوقاتكم .. أقرأوه .. فهو وجبه خفيفه لا أكثر .. وإن شئتم رد الجميل ففي نهايته ستجدون صفحة (الجود ريدز) الخاصه بي فاخبروني فيها برأيكم ، وستجدون ايميلي فاتحفوني فيه باقتراحاتكم ، وستجدون رقم تليفوني فحولوا لي عليه رصيد بارك الله فيكم .. أشكركم شكراً جزيلاً وانتظر رأيكم بالكتاب ..

خالد بيومي فهمي

<http://www.facebook.com/fanila.dakhelia>

أقوال بتحاول تبقى مأثوره

مصر هي البلد الوحيد اللي لما
الأغاني الوطنية فيها بتزيد بتلاقى
البلد بتراجع لورا ..
متفهمش ازاي !!



الناس اتغيرت بعد الثورة وبقى
حب البلد بيغلى فى قلوبهم ،
وأكبر دليل على كده انى كل ما
بشترى علم مصر بيتسرق ..
قد كده ييجو كى يا بلدى !!؟



طول ما الشاب اللي بينزل التفرير
دلوقتي هو نفسه اللي بيعاكس البنات
بعد الظهر وهو نفسه اللي يبسب
الدين عالقهوه و هو نفسه اللي
بيزمنق زمايله فى الشغل .. عمر ما
البلد دى هتصلح ..



ليه بقيت حاسس انه التعامل فى
مصر بقى قايم على مبدأين ..
جر الشكل ..
و إنه مفيش حد مريح حد ..



احنا أحسن شعب يروح أى مكان
ياكل بـ ألف جنيه وميرضاش
يفتح ازازه الميه المعرنيه عشان
ميرفحش تمنها ..



أجمل فتره فى البواز هى اللى
قبل الطلاق علطول ..



كلمه (لا مؤاخذة) لما بتيبي قبل أى
كلمه بتغير معناها تماماً ، وأذكر إنى مره
كنت فى محل كمبيوتر ولقيت مروحه
شكلها غريب فسألت اللى واقف : هى
دى ايه ، قالى مروحه لابتوب ؟ ، قتلته
ودى (لا مؤاخذة) بتتط فين؟؟! ، قالى
(لا مؤاخذة) من تمت
!!!!!!!



بصوا يا جماعة، الموضوع مفيوش
لفبطه .. قانون الضبطيه القضائيه
بيدى الحق لضابط الجيش وضابط
المخابرات يوقفك ويفتشك تمام
زى ضابط الشرطة .. يعنى
متلفبطش القلم جايلك مينين طالما
قفاك لسه مكانه ..



يا عينى الفئه الوعيده اللى مش
هتقدر تنزل تعترض على أى
زياده فى الضرائب البديده همه
الجماعه بتوع السجاير والمعسل
والبيهره ، لأن كل ما هيتفقوا على
مكان للمليونيه هتلاقى كل واحد
راح فى عته شكل ..



بيتهيألى لو النيابة العامه جابت عبد
الله بدر وواجهته بفيديوهات
الشتايم والبزاهه بتاعته هيستغرب
نفسه وهيقولهم ده مش أنا ،
فليست هذه أفلاقي ولا أفلاق
الاسلام ، من بالفيديو إنما هو
داعر وزانى وعاهر ويعتليه الرجال.



الانتخابات فى بلادى هى أن
تصوّت لأكثر الكازيين صدقاً ..



لا أعتقد أن إسرائيل قد تفكر
في فوض حرب معنا في
السنوات العشر القادمة ، ليس
لطفاً منها ، بل لأن كل شيء
لدينا مدغغج جاهز ..



هناك ثورات تأتي نتائجها بتوفيق
الله وهناك ثورات تأتي نتائجها
بتوفيق عكاشه ..



قالى اخبار شغلك الكومى ايه؟ ..
قتله مفيش ، بنزل من بيتى
سبعه ، بوصل بيتى سبعه وخمسه ..



عندما أرى المسلمين يغضبون
بهذه القوة دفاعاً عن نبيهم أتعجب
أن كيف ألهم الله الهندوس الصبر
ونحن نأكل إلههم كل يوم ..



مدش بييله ,زقه وهو قاعد
عالكرسی .. ما عدا الرؤساء .. كل
ما ييلزقوا فى الكرسی أكثر .. كل
ما ,زقهم يكثر أكثر وأكثر ..



مصر حلوه بس فى الكليات ..



تبقى الشعوب للأبد ويتوالى عليها
الكلام ، و يبقى مكاننا لتتوالى
عليهم الشعوب ..



أكثر حاجة بتوجعنى عالفيس لما ألقى
بنت كاتبه انها فلاص هتتظب
ومسافه ما افش بروفايلها اباركلها
ألاقيني أنا - و الميه و خمسين
شاب اللي عندها - معمولنا ديليت
فى ٣ ثوانى ..

المجرد لكل بنت محسستيش انى كنت
مجرد اوبشن ..



نفسى أعيش لليوم اللى أشوف
فيه كلمه (صنع فى مصر) مطوطه
على أى حاجه تانيه غير الملابس
الداخليه وقواعد التواليتات ..



ويظل الكاتب السافر سافراً حتى

يموت ..

أو يتزوج ..



أرحب بجهاب الإعلاميات ولو أنى
أرى أن هناك إعلاميون كانوا
أولى بالطرحه ..



الله یرحمک یا أبویا ... کنت لما تشوفنی
مضایق تقولی معلش .. استعمل .. هی
الدنیا کده .. زی ما فیه حاجات وحشه
بتضایقک هتلاقى حاجات تانیه علوه
بتفرمک .. واعشنى یا أبویا قوی وواعشنى
کلامک .. بقالی ۳۰ سنه عایش بمکمتک
وراضى .. ولو انى کان نفسى قبل ما
تمشى تقولى .. هی الحاجات العلوه دى
هتیبى امتى بقى بالصلاه عالنبى ؟!!!!



البنات نوعين ..
بنات بنتبوزها ..
وبنات بنعملها وول بابر ..



بتلاقيها كاتبه عالفيسبوك : اللهم ارزقني عريساً
يأخذني للجنه ويؤمنني في الصلاة ونفتم سوياً
القرآن ونقوم الليل ونصوم اتنين وخميس
وسبمن الله يا شيخ أول ما يبى العريس
تقوم مطلعها أيمانات أمه ..



لا يهمنى أن يكون، ئيسى مافظاً
للقرآن بقدر ما يهمنى أن يكون
عاملاً به ..



أول حلقة فى المسلسل : المصرى
المبرع الفهلوى اللى يفوت فى
المريد ويفهمها وهى طايره وممدش
يقدر يضحك عليه واللى هيسافر بره
يكافح و يكون نفسه ..

بقيت الـ ٢٩ حلقة : بيدور على اللى
نصب عليه و سرق منه باسبوره ..



مآسى البلد كترت ، و الواحد من
كتر صور الحداد اللي بيصطها عالفيس
نسى فلقتة بقت عاملة ازاي..



هناك أشخاص في العالم لم تكن
ظروف المياه هي سر شقائهم بقدر
ما كان غبائهم هو سر تعاسه تبت
اللى بابوهم ..



احنا البلد الوحيد اللي أصحاب
الشهادات فيها بيبقى ليهم وضعهم
قدام كل الناس لكنهم يتتولوا
فبأه لصبي قهوجي أول ما يبيلهم
سباك يغير لهم السفون ..



إذا ما تم تهديدك في بلدك .. إذا ما
صدرت مذكره باعتقالك .. فاستنجد
بأمريكا واعتمدهم أمام سفارتها .. و لكن
لا تهتف أو تصرخ .. لا تقم بقطع
شرايينك .. لا تضرب عن الطعام ..
فقط أمسك كلباً ضالاً وهدد بزبده
وبرفع الفيديو عاليوتيوب .. عندها
ستجد أساطيل الأطلنطي قادمة
لإنقاذك..



الحمد لله ...

الثوره عدت مرحله الفطر ...

وبدأت مرحله الوداع ..



أول ما شوفت أبو علاء فى
السجن قلت القانون يياخد مجراه،
وأول ما شوفت أم ايمن فى
الدستور قلت القانون يياخد
ترامبول ..



قالونا القضاء فى مصر مستقل ..
بس مقالوناش عن مين ؟



الثوره فضلت ترجع لورا ..
و ترجع لورا ..
و ترجع لورا ..
لما خبطت فى ثوره يوليو..



صدق اللى قال "عدوك ابن كارك" و
إن "المدايه مبتدرفش كتاكيت" .. حكمتين
بسمعوم كل يوم ومآمنتش بيوم غير لما
أتأزيت من أعز الناس .. ودى نتيجته إن
الواحد بيمشى ورا التكاتك والميكروباصات
من غير ما يصدق الكلام اللى بيكتبوه ورا ..



حتى لو اتبدل المال وبقت بلدنا
أفضل بلد و حتى لو اتسنت
الظروف وبقوا ناسنا احسن ناس
فمن بين كل الأجيال اللي فاحت
والأجيال اللي بايه هيفضل جيلنا هو
الوحيد اللي جواه حبه زعل مش
هيروها أبداً.....



مبارك فضل ثلاثين سنة زالل اللى
جابونا بالضربة البويه ، وشفيق كل ما
هر يضايقه يقولك "ده أنا كنت مقاتل
فى القوات البويه" ، يا أنى
متفهمش الناس دى لما بتطلع فوق
بيصلها ايه ..



مقاً لم أكن أدرك كيف كانت الفنانة غاده
عبد الرازق ذات حكمة وبصيرة عندما
اقتصرت منذ سنتين كل ما نحن عليه
الآن من هرج ومرج وعدم فهم في
مقولتها الفالده و الأروع على الإطلاق :
"الهانص في الدانص يا أكسيلانس .."

عشتى يا غاده مبدعه .. و حره .. و متحرره
من كل اللي يتقل حركتك يا غاليه ..



ففي المليونيات كل ما يمسكوا واد بلطبي
يصوره بالفانله واللباس ويعرضوا جنب
صورتها كانه الفزب الوطني اللي لقوه معاه
.. والله العيال البلطبيه دي أصيله قوى ..
بتنسى تلبس هدموها وبتنسى تاخذ بطايقها
بس مبتساش تدب كانه الوطني في
بوكسراتها قبل ما تنزل تتبلطج .. عرفتي
تربي يا سوزي ..



عندما يتحول المشهور السياسي إلى
مشهور إباحي يتوقف القلم عن
الكتابة .. ويكتفى بالفرجة ..



ويظل الجانب المضيء من قصه
مهندس الاتصالات اللي قدر
يقترق شبكات المحمول التلاته إن
التعليم في مصر لسه بغير ..



لماذا يرمل عنا الأبناء ولا يتبقى
فى حياتنا سوى الناس الأومليت!!



الله يفرّب بيت اللى قال على
الفييس بوك و تويتر مواقع تواصل
اجتماعى .. هو فين التواصل ده ???
أنا من ساعه ما دخلتها وأنا معدتش
بشوف حد !!



فراقنا حبيبتى لا يعنى أن فى أنوثتك
نقصاً أو أن فى رجولتى عيباً ،
فأنوثتك كامله بدون رجل يدللها،
ورجولتى كامله دون أنثى تقتويها ..
وصمتى حبيبتى لا يعنى أنى لا أحبك
.. بل لأن صوتى لم يعد له وجود ..
فأنا من الصباح الباكر أتأدى :

بـولاق .. بـولاق .. بـولاق
الأبهر رررررره ورا ...



يُناسب الفيس بوك انطوائيه
البعض منا بطريقه مزهله .. فهو
المكان الوحيد الذي يمكننا فيه أن
نكتسب عشرات الصداقات يومياً
بضغطه ماوس دون تكلف عناء
الابتسام ..



الراجل مننا ملوش غير بيته ..
ومراته ..
وصاحبته ..



أخبرني عندما زرته في بيته أنه ليس بالضروره
أن يأتي المب قبل الزواج ولكنه عتماً و يقيناً
سيأتي بعد الزواج ، وستنب من ترتبط بها ولن
تستطيع العيش بدونها .. سألته إن كان على
هذا الأساس وجد المب فيمن تزوجها .. قال
لى ليس بعد ولكن عنده أمل .. شربت ما
تبقى من الشاي وهنأته على عيد زواجه السابع
عشر ثم انصرفت ..



نفسى ارجع لأيام البراءه
والنقاء بتاعت زمان .. وتهديراً
قبل ظهور هيفاء وهبى و
نانسى عجرم ..



يبدو أنه لم يعد هناك وجود للفير
المطلق ، فالفير الوحيد الموجود
الآن (نسبي) ، و هو ذلك الفارق
الضئيل بين مصييه .. ومصييه ثانيه
أنيل منها ..



ليت لى وطنٌ لا تهب غيومه
- مها كثرت - ابتسامة السماء ..



إن، زكك الله بزوجه فحافظ عليها لأنه
شعورٌ قاس أن تهفك نفسك على
مكرونة بالبشامل نهار الجمعة فلا تبرد
من يسهفك .. وإن لم يكن لديك
فلا تبتأس وأحمد الله على وجود ١٢
نكهة للإندومي وإلا قتلك الممل ..



واحد صاحبى لقانى صدغه بعد ١٢ سنه عالفيس ..

عملى آدر ..

عملته اكسبیت ..

بعته بوسه ..

بعته حضن ..

بعته ريكويست للمزرعه السعيده .. مقبلتوش ..

قام عملى ديليت ..

وهى دى الصداقه مع فيسبوك زيرو ..



هل تعلم أن البنت المصرية قد تفقد جزءاً
من أنوثتها إذا ممطش ١٥ قلب جنب أى
ستاتس أو كومننت بتكتبه حتى لو كان

تعبت ♥ و نفسى ♥ أنتهر ..
أو ..

أبوياء ♥ طلق ♥ أمى ♥ أول ♥ امبارح .



نسيت طعم الفرحة ..
وفايف لو جتنى مره واحده ..
أموت من الفرحة ..



أنا مدين لزوجتي بكل النجاحات فى
حياتى .. وأيضاً كل المصائب ..



يا له من منظر ...
البحر أمامى ...
البحر ورائى ...
البحر عن يمينى ...
البحر عن شمالى ...
فى الواقع ...

.

.

إنى أغرق .. !!



نفسى اعرف ايه
المرض اللى بيعانى
منه مبارك وهفليه
يقعد ١٤ سنه ده ???



زمان كانت الشبكة بسيطة ورقيقه
فكان معناها "ببببك يا قلبى" إنما
دلوقتى بقت مرهقه وغاليه فبقى
معناها "آآآه يا قلبى" ..



ليس بالضرورة كوني مع
ثوره الشعب أن أكون
دائماً مع شعب الثوره ..



أنا زوج مثالي جداً ..
بشهادته كل الستات اللي عرفتهم ..



الأدب السافر غير مقتصر على
كتاب معين فكل مصرى بدافله
سافر صغير ينتظر الفرصه للظهور ..
هو بس محتاج اللى يزغزغه ..



طموح الشاب قبل الزواج يقتلف عما
بعده .. فالشاب قبل الزواج يسعى
للترقى فى عمله لكى يصل إلى
مستوى العيش المناسب الذى يؤهله
للزواج نفسه .. فإذا ما تزوج فإنه
يسعى كى يكون هذا العيش .. طرى
وبسببهم ..



كان وصيداً فتزوج ..
عندها ..
صار أكثر وحدة ..



تقريباً أنا الكاتب الوحيد اللي
من قله معبينه لما بشوف حد
فيهم يبرى أسلم عليه وأتصور
معاه !!



هو أنا دلوقتى المفروض لو
شوفت عيل من العيال اللي
بتلبس بناطيل سكينى ضيق دى
أغض البصر !!?



لو كان الإسلام جلباباً وليمه لما
حارب الرسول (صلى الله عليه وسلم) كفار
قريش .. فقد كانت لهم تبلىغ
الأرض طولاً وبالتأكيد لم يكن
لديهم فروع "بيار كادران" لصناعه
البزلات الراقية ..



الناس نوعان ..

تعساء ..

و سعراء يبيرون انشاء تعاستهم ..



ياخدوا من الضرايب اللي بيدفعها
شعب مش لاقى ياكل ولا يشرب
عشان يستضيفوا بيها ممثل يقولنا
هو ييب ياكل ايه ويشرب ايه؟!..
.. شوفت سفاله اكر من كره!..



مع قرب نهاية العام ..
قرب متستاش ..
تفويض في كل مكان ..
فيه منه قسط وكاش ..
وكله عليه الفصم ..
إلا انت يا اللي في مصر ..
مش عارفين لسه فصمك كام ..
علشان في الأصل ..
سعرك لسه بلاش !



نفسى أجمع كل أحداث ما بعد الثورة بدءاً
بتصريحات عكاشه ، لبنان عمرو مصطفى ، لوبل
البرلمان ، لإخوانيه غاده ، لسلفيه سميه ، لفروج
العسكر الآمن ، لتصيين قرارات الرئيس ،
لكذب الإخوان ، لعك الدستوريه ، لهبوط البنيه
، لـ أين البرلمان ، لـ هاتولى راجل وأعط كل
ده فى فيلم ثورى كبير بعنوان :
أحييه يا بلر أحيييه ..



آه منك يا أم عيون عسلى و طرعه موف ..
عملتى لنفسك Tag فى قلبى الرهيو ف ..
بعدين فلعتى بدرى بدرى ..
وسبتى قلبى ييكى ييكى ..
هوه انتى مش عارفه إنه قلبى يا قلبى ..
مفلوق بـ Add من غير ريموف ..

من روائع الشعر المعفن



أرسلت لواءه رسالة عالان بوكس
استاذته انى اضيفه عندى فى
الفييس بوك .. لقيته يقولى
معلش عشان معنديش فييس
بوك .. يعنى مش بس متآمر .. لأ
.. متآمر وأهبل ..



بس الشهاده لله إنه أجمل ما فى ثورتنا
العظيمه هى أنها أوصلت السياسه لكل
مستويات الشعب بعد ما كانت بس
مقتصره عالنفه المثقفه .. شعور بالفقر لما
تفش الفيسبوك وتلاقى (ريم _
المستعجله) دابه فناقه مع (تاه _ مش _
مرتاه) عشان مقتلفين عالفرق ما بين
دينه الدوله وعلمانيتها ..



زوجتي مرفوه الاعماس ألت على أن
ننتقل سوياً بعيد زواجنا ...
ولأني شديد الانشغال فاعتذرت ..
ولأنها شديدة الرومانسيه فلم ترد تفويت
المناسبه

لقد اعتقلت به مع رجل آخر ...
يا لرومانسيتها الفائقه ..
أوليس هذا سبباً لأن أهيم بها عشقا !!؟



(السى دى) فى ايد مرتضى منصور
بيتهول من :
"فاضى" الى "فاضح"



نفسى اعرف ايه هو السن اللى
المفروض أوصله عشان اقدر اقف
فى البلكونه بكل ثقه واقول للعيال
بتوع الابتدائى والاعدادى نفس اللى
كان بيتقالى لما كنت فى سنهم :
" عليا النعمه انتوا بيل فاقد وعيال
مش خالاه !"



فى بلدٍ لا تُتمل ، لشعب لا
يُتمل ، و فى ظروفٍ لا تُتمل ،
يظل الشئ الوحيد المتمل فيها
هو «المرشح المتمل» ، فإن فاز
بالرئاسه أصبح كغيره لا يُتمل ..



نميلُ إلى زعيمٍ سياسيٍّ .. فيتحول الميْلُ
لاختيار .. ثم لـ اقتناع .. ثم لـ إيمان .. ثم لـ
حب .. ثم لـ عشق .. ثم لـ ولع .. ثم لـ
تقديس .. ثم لـ تأليه .. ثم للتعليل من
أجل الصغيره قبل الكبيره ... ثم لإلتماس العذر
على البلوى و الفطيه .. وهكذا تفنع إرادتنا
فنمنع عبودتنا .. وهكذا تقسى قلوبهم فيمنعون
أسطورتهم .. وهكذا يا عزيزي نصوصنا بأيدينا -
في بلادنا - الأباطره و الفراعين ..



نغمه "أنت أكيد سلفي؟!!!" .. "أنت أكيد
إخواني؟!!!" هي ما تبعلني أفكر ألف مره
قبل أن أنشر أي بوست ديني عالفيس بوك
ولأن الدين صار مكرراً على السلفيه والافوان ..
و أفشى أن أصل إلى اليوم الذي اضطر فيه
لائفاء اسلامي أو أن أدرس قرآني الصغير في
أعماق أعماق جيبى كى لا يظهر طرفه للماره
فيظنون أنى "من أتباع محمد؟!"



المُفجع أن رجل الدين الممارس
للسياسة في بلادنا - وإن ضلَّ و
كذب - فسيظل له اتباع
وهؤيدون أكثر حتى من الساسة
الصارقين ..



أقسم لك يا عزيزي - وسامني إن ضايقتك صراحتي - أن زعيمك السياسي الذي تعشقه من الموت لن يبقى لأجلك في البلاد إذا ما انتكست البلاد أكثر وأكثر و انهدرت للقاع و أصابها الجوع والوباء والطاعون وصارت الدوايح تفوح من بثث الشوارع .. لن يموت أحدهم لأجلك ، أنت فقط من تموت لأجلهم ، زعمائنا يا عزيزي جميعهم يرفلون في البنخ والنعيم ، مليونيرات ، سيغادرون إلى خارج بلادنا لمظه السقوط بغير ربحه ، و يا روح ما بعدك روح .. الليبراليون إلى أمريكا وأوربا ، و مشايخ الإخوان والسلفيه إلى قصور الفليج والدول العرييه ، والمثقفون تنتظرهم المؤتمرات ووظائف الاستشاريه في كل دول العالم ، ولن يتبقى في بلادنا يا عزيزي سوى أنا وأنت .. فقيران .. جائعان .. تائهان .. مريضان ... نتقاتل ونمارب بعضنا البعض من أجل رغيغ الفبز بعد أن كنا بالأمس نقف جنباً إلى جنب نطالبهم بالكرامه والمريه ، لكنهم رحلوا بعد أن أفقدونا بعنادهم ، وأمروضونا بصراعاتهم ثم جعلونا نتقاتل لأجل مسمياتٍ صدروها إلينا لم نعرفها قبل اليوم .. مسمياتٍ كـ (الشرعيه) و (الشريعه) و (الهويّه) و (دينه الدوله و مدينتها)



لا تطلبوا من العام الجديد أن
يأتيكم بالفير .. فالأعوام لا تأتي
بفير ولا بـ شر .. الأعوام لا
تأتي أصلاً .. بل نحن من نذهب
إليها محملين بـ إرثنا البغيض من
الأعوام السابقة ..



نفتخر بأننا الشعب الوحيد الذي
استطاع تغيير الوظيفة الأساسية
لكلاكس العرييه من أداء تتييه
مزعبه إلى أداء بتصف نشاطات
أمك الجنسيه بطريقه موسيقيه
ناعمه ..

تى تى التيسبيته ..



شعبنا شريد الترين لدرجه أن
نصف عاهراته مهببات ..



المضحك أن ملايين ممن يتمنون
الفلور لا يبدون ما يفعلونه في
أوقات فراغهم ..

Suzan Artz



لكاتب ساخر يسعى للشهرة ويطلب
الانتشار، قررت أعمل زي عمر طاهر
، مش هو بينزل مقالاته مع صورته ،
أنا كمان هنزل مقالاتي مع صورته ..



مكنتش بهب الستات ..
قالولى جرب و اتبوز ..
اتبوزت ..
ومن ساعتها وأنا بهب كل الستات ..



عدد الأغاني الموداه لأرواح
الشهدا بقت أكثر من عدد الشهدا
نفسهم ..



احترس منطقة وغي



النهارده وقفت فى كمين شرطه و الضابط سبب رفضى
عشان منتهيه وعملى ممرضه مخالفه .. لكن رغم سبب
الرفض ورغم المخالفه كنت مبسوط وراضى .. مبسوط
عشان الانضباط المرورى رجع زى الأول .. وراضى
عشان الشرطه بقت تشوف شغلها زى زمان .. الحاجه
الوحيدى اللى كانت مزعلانى إنه الضمير للأسف فضل زى
هو متغيرش .. ابن المفكوكه كان عايز أربعين جنيه
عشان يرجعهاالى بس أنا طبعاً مفالفتش مبادئى و ادبته
عشرين جنيه زى كل مره .. كم أنتى عظيمه يا مصر ..



رکبت مع سواق تاکسی .. بيقولى متعرفش تردد
قناه أون تی فی کام ؟ .. قولته لأ لیه ؟ ... قالی
و هو منشکح من الانبساط اصلی طلعت فی
التلفزيون فی لقاء عن الانتقابات معاهم ..
قولته ها طب و قولت ایه بقی ؟ .. قالی لا انا
ماقولتش انا کنت معدی بالتاکسی من وراهم
وطلعت فی الصورة بس ..

موقف حصل لواحد معرفوش



قبل يوم ٢٥ يناير تقدمت لوزاره التضامن الاجتماعى
بطلب إنشاء جمعية .. و قلت طالما فيه جمعية للرفق
بالميوان عشان تسمى الميوانات من قسوه الانسان ..
ياريت يبقى فيه جمعية (الرفق بالمواطن المصرى) عشان
تسمى المواطن من القسوه والظلم وغياب العدالة ..
اعترضت الوزاره على اسم الجمعية لأن ده معناه أنها
بتعترف ضمناً إن النظام ظالم .. و بعد مناقشات و كلام
كثير قالولى ممكن ندمج الاسمين مع بعض .. جمعية
الرفق بالميوان مع جمعية الرفق بالمواطن المصرى و
يبقى الاسم الجديد..

جمعية الرفق بالمواطن المصرى الميوان ..



واحد شكله جريد عاليفيس باعتلى عالانبوكس وييقولى "هو أنت تعرفنى؟؟؟"
 .. قلت له "لأ معرفكشى" .. قالى لى "أصل انت بتظهرلى كتير عالجنب
 ضمن الأصدقاء المشتركين فقلت أكيد يعرفنى" .. قلت له "لا والمصنف
 معرفكش" .. قالى "بس ده بينى وبينك ٣٢ صديق مشترك" .. قلت له
 "و رب الكعبه معرفك" .. قالى "بص انا عملتك آدر عشان أنت كل
 شويه بتظهرلى فى العمود اللى عالجنب ده فيمكن تطلع تعرفنى" .. قلت له
 "يا مرعب يا سبرى بس للأمانه أنا معرفكش" .. قاللى "طب تعرف
 بقى واحد اسمه (محمود مش عارف ايه)" .. قلت له "لأ والله معرفكش"
 .. قالى "أصل انا لما عملتك آدر لقيته ظهرلى ضمن الاصدقاء المشتركين
 فقلت أكيد يعرفنى" .. قلت له "معرفكش و لو فضلت تضيف الناس
 بالطريقه دى هتلاقى نفسك بتتعرف عاليفيس كله فى فمس دقايق" .. قالى
 "طب أعمل ايه؟ بلائيكو بتظهرولى كتير عالجنب كل شويه وأنا بزهدق
 فبأضيفكوا وأقول يمكن يعرفونى" .. قلت له "طب طالما بتزهدق مريمتش
 دماغك ليه و عملت لنا كلنا بلوك عشان منظهرلكش فالص عالجنب ده كل
 شويه" .. قالى "ما أنا هفت تطلعوا تعرفونى فى الآخر فتدوروا عليا فى
 الفيس تلاقونى عاملكوا بلوك فتزعلوا" !!!! قلت له فعلاً... "الغباء لا
 دين لَه» ...

بشوف دائماً فى الأفلام الأجنبى لما البطل بيبقى مهزوم وبيواجه
صعوبات بيقوم داخل الممام ولا اوضه النوم ويقوم باصص فى
المرايه ويقول نفسه ..

Trust your self ! .. Yes! .. Yes
You can do this! .. You can do this!

بعديها يقوم خارج كأنه واحد تانى .. واثق من نفسه .. ومدغرخ الدنيا
ومسوى الهوايل ..
انا بقى نفسى اعرف المرايات اللى بيبصوا فيها دى بتتباع
خين؟؟!!!!



نفسى ألقى حد من النقبه المثقفه اللى تعدت الستين و السبعين
كاتب على تويتر انه مببط أو مضايق أو مكثب زى ما انا بنعمل
بالظبط .. أو ألاقيه حاطط صوره صفته الرسميه بالفيس بوك سواد وكاتب
ستاتس كئيبه وانه قرخان من اللى بيحصل زى برضه ماانا بنعمل بالظبط
.. مش عارف ليه جيلنا على صغر سنه هو اللى بيكتب ويبتيل على عينه
فى الوقت اللى همه و رجليهم والقبر بتلاقيهم بيطلعوا فى التوك شوز
والجرايد والمجلات بالكراختات المزهرزه والبذل المكويه و يتكلموا بكل
حماس وأمل وسعاده عن الأحداث المهيبه اللى بتصل حوالينا من غير
ما يبرالهم حاجه .. نفسى اشوف حد من النقبه زعلان بيد ومن زعله
جت له سكته قلبيه مات فى نص البرنامج .. مش عارف ليه مبلاقيش
كره .. ليه الإحساس مقصور على جيلنا بس وعندهم همه استثناء .. ليه
الاكتئاب والاحباط علامه مميزه عندنا وهمه ميكتبوش عالاطلاق ؟ يمكن
عشان لسه انا هبل و بنصدق فبنتصدم وهمه فهموا من زمان انه
مدرش بيكتب قوى إلا لما يصدق قوى فبطلوا يمسوا ويصدقوا .. ولا
يمكن عشان همه عارفين إنه كل اللى بيحصل ده تمثيليه و آخرها
معروف و دورهم فيها مفوظ فعلى ايه التعب و ليه القلق؟ ... بيد نفسى
اعرف..

من كام يوم شوفت واحده ست على قد هالها بتفانق فى مطعم من المطاعم و بتزقق فى المدير واللى شغالين معاه عشان الأكل اتأخر ساعه كامله وابنها بجان .. ابنها ده عمره "١٣ - ١٤" سنه و قرها فى المبحم مرتين .. و الست مكنتش بتتعالى ولا بتتكبر ولا عايزه تأخر دور حد ،كل المكايه انها كأم مكنتش مستعمله تشوف ابنها بجان كده والأكل متأخر عليه..

الأكل به والمشكله اتملت .. الأم وابنها قعدوا ياكلوا .. بصيت عليهم و لقتنى مستعجب .. انه ازاي الأم على قد شراستها من خمس دقائق و هى بتزقق فى خمستاشر واحد وواقفه قدامهم زى الأسد على قد حنيتها دلوقتى وهى قاعده جنب ابنها مبتاكلش لكن بتناوله الميه والمناديل و بتقطع له الأكل حنت صغيره وبترصه فى طبقه عشان ياكل علطول ميفضعش وقت فى التقطيع .. وساعتها سألت نفسى سؤال :

إذا كانت الأم - أى أم فى الدنيا - ممكن تتوجع كده و تتبئن لو شافت ابنها بجان ... امال الأمهات اللى بيسمعوا خبر موت عيالهم فى بورسعيد والتبرير و الاتماويه وغيرها .. بيبقى شكلهم عامل ازاي؟!
نسأل الله السلامه ..

لقيت ناس ملامه على ولد مغمى عليه فى الشارع وبتناول
تفوقه .. قتلهم طوه فى العريه وهوصله لأقرب مستشفى فى
أسرع وقت .. الولد ركب وكان معاه ابوه واتمشر معاه سبتاشر
واحد فضلوا يقولولى طول السكه : يلا يا ابنى ، وبسرعه يا ابنى ،
وشهول يا ابنى .. وأنا بماول بأقصى سرعه ومتغاض من استعجالهم
ليا بس قلت معزورين وثايفين عالولد .. أول ما وصلت لقيت
الراجل خد ابنه عالمستشفى وجبرى .. أما السبتاشر واحد فكل واحد
راح فى اتباه .. قتلهم يا جماعه مش هتفشوا مع الراجل؟! ..
قالولى موهو خلاص عارف السكه .. قتلهم أمال انتو مشرتوا
نفسكو معانا ليه .. قالولى لقيناك طالع أول الشارع قلنا نركب
معاك .. آه يا ولاد الكلب يا رمم .. ده أنا فاعل خير مش سواق
توكتوك يا ولاد ال حرام ..



لامظت انه الأثانيه اللي عند الناس مش عايزه تنتهى .. طب طالما فيه أزمه فى البنزين والمصحات قليلة وعليها طواير له ميقاش فى نوع من الإحساس بالآخرين؟؟ .. له كل واحد مصمم يفوّل ويملا التانك بتاعه للآخر؟؟؟ .. طب ما تقلى عند أهلك دم وتسيب بؤ لزميلك .. يا أفى املا نص التانك وامشى بيه كام يوم لدر ما رينا يفربها .. انما الفوف مفلى كل واحد عايز يفوّل عشان مش عارف الأيام البايه هيبقى شكلها عامل ازاى!! .. النهارده الواحد اتعزب عشان البشر الكثير اللي مصممه تملا عربياتها للآخر .. وأنا عربيتى المكملمه مفيهاش غير لتر واحد وهتقطع منى فى أى لمظه .. واللى فوفنى أكثر إن العامل بتاع المصطه بيعدرى على كل العربيات اللي واقفه فى الطابور و بابتسامه كلها أمل و إشراق يبمزر الناس إنه البنزين ممكن يفحص فى أى لمظه فاحنا وحظنا و مدرس يزعل .. وكان قدامى مثلاً يببى ٣٠٠ عربيه .. وكل وغد بيوصل للمكنه بتاعت البنزين ينزل من عربيته ويبص لكل الصنف بشماته ويقول الواد بكل الاطه (فول للآخر) ويفش هو "اون زارن" يببى كارت عشره و كانز ببس .. يا أفى متتهو فى عربيتك و تمطلك فمسه لتر ولا حاجه يمشوك يومين مش لازم أم الأثانيه دى .. فلى لنا شويه .. ولكن لا عياه لمن تتادى .. بس الحمد لله .. الحمد لله فعلاً .. عشان العبد لله نيته صافيه وقلبه عالناس وصلت للتانك بسلام بعد ساعه زمن .. و لما الراجل سألنى امط بقدر ايه .. قولى له املاااa

ستتسبات الإباط والاكئاب على الفيس بوك صارت تتزايد بشكل ملفوظ ..
مزاجى الشففى لم أعد اتكلم به بل صار كوككشن من أمزجه الآخرىن ..
قراىى يومياً عن البنات مبرومات القلوب زوات الثالثة عشر عاماً واللأى
اغتيال أنوثتهون أولاد لم يبلغوا سن الرشد بعد صارت سلواً متبعاً .. و فىما
بىن هؤلاء وهؤلاء صرت اتابع بشغف الكدر الذى يتدلوق من استاتسات
العاطلىن و المطلقىن والممىبن والمكلومىن والباعشىن عن عمل والقرفانىن
من عملهم وأولئك الذىن لا يعانون المشاكل بل فقط مهوسون بالتكىد على
فلق الله .. افتقد طعم الكتابى الممىز و الذى تاه وسط الكهات المقتلفه
لاكتئاب الفرنرز .. ف كل يوم أتذوق طعماً جديداً للإباط .. وكل يوم أجبر
على أن أعىش ستاتس بتدلوق طىن لفاشل أصر على مقاسمتى كآبتها لمجرد
إنى متلحق عنده فى لسته الأصدقاء .. كآبتى تتضاعف ومالى يسوء .. و أعترف
.. أن نصف ممولات الانتار التى قمت بها فى الأيام الثلاثة الماضىه كانت
لتأثرى بقصص أناس لم أقابلهم فى حىاتى قط ...
فترفقوا بمالى - و مال الفرنرز لرىكم - ىرعمكم الله ..



من أظرف الرسائل اللى بت لى عالإيميل :
"أستاذ خالد .. كل عام وأنت بفير و ربنا يوفقك فى
مسيرتك الأديبه ... و إن شاء الله ييبى يوم أشوفك فيه
زى محمود السعدنى ، وأحمد بوهبت ، وعبد الوهاب مطاوع
، وجلال عامر ، رحمه الله عليهم جميعاً!!!!!!"....



زمان لما كان جهاز الكمبيوتر بتاعى يبوظ ومعرفش العيب منين كنت بلبأ للتكنيك اللى بيعمله كل الشباب اللى مش عايزين يدفعوا الـ ٢٠ جنيه صيانه .. (التباديل والتوافيق) ، أبدا الرامات واعط واحد جديده ، لو الجهاز اشتغل يبقى العيب كان منها ، ولو مشتغلش اجره حاجه ثانيه .. كارت الشاشة مثلاً ، أبداه بكارت تانى ، لو الجهاز اشتغل يبقى العيب كان منه ، لو مشتغلش يبقى العيب فى حاجه ثانيه .. أجرب اغبط الـ Case على نفوقها ، أو اشطف البروسيوسر بال ميه والصابون ، أو ازرع الشاشة فى الميطه ، و أفضل كده لمر ما الجهاز ينطق ... تكنيك ظريف ولطيف وببييب من الآخر ...

وبما إننا فى البلد دلوقتى الدنيا سودا و مش عارفين السواد ده سببه مرسى ولا الفلول ولا هو الشعب أصلاً اللى متبيل على عينه فأنا رأى الشفصى نفذ الطريقه دى ، يعنى مثلاً على اخر الشهر ده نشيل مرسى و نيبب مكانه عمدين ونشوف الأداء بعد اربع شهور ، لو الشعب قام باور مع عمدين يبقى مرسى كان فاربها وقاعد على تلها ، و لو منطقس يبقى عمدين ، اخر فشك و نيبب مر تانى براله ، أبو الفتوح مثلاً ، لو الشعب فاق وصى مع تتح يبقى الراجل ده اللى معاه الفلاصه ، ولو فضل فاصل شمن يبقى تتح ، اخر فشك و يركن جنب زميله ، نبرب شفيق بعدها ، لو الشعب منطقس مع شفيق يبقى نشيله ونمطه فى السبن علطول ، أما لو نطق معاه .. فبرضه نشيله ونمطه فى السبن علطول ..

وهكذا يا جردعان نفضل نبرب الـ ١٣ مرشح مع الشعب ده بواقع مرشح كل ٤ شهور ، والله المرشح اللى هيفل الشعب يلعلط و الدنيا تزأطط وغاده عبد الرازق ترجع توز بنفس زى زمان يبقى هو ده المرشح الى فاهم نفسية البلد دى وهو اللى هيستمر ، أما بقى لو الـ ١٣ مرشح جم و فلهوا والدنيا فضلت زى ما هى يبقى الشعب ده هو اللى ابن كلب جزمه عايز المرق ومفيش حاجه بتوق مع أمه ، ولكن برضه ده مش معناه انه الـ ١٣ مرشح كويسين ، عملاً بمبدأ التوافيق والتباديل لازم نتأكد منوم برضه ، اننا نقبرهم مع حاجه شغاله أوليردى ، ناخرهم كرؤساء لشعوب العالم الأول ، لو الشعوب دى فضلت مستقره ومتقدمه زى ما هى يبقى المرشحين دول كفاءه وناس بتفهم ، أما بقى لو فرنسا فى يومين بقت زيمابوى و المانيا بقت نسفه من آخر فيصل و الدنمارك مبتتش تفرق حاجه عن الرويقه يبقى تعرف إنه ربنا بلانا بأوسخ شعب و أوسخ مرشحين وأوسخ بلد و مسي الله ونعم الوكيل فيكو يا بنى آدميين ...

ثوره التكايف

من كتاب فافلة داخلية تتسع لعدة أشخاص



حتى وقت قريب كنت أظن أن العلم الحديث قد توقف عن الابتكار والاختراع في عالم النقل والمواصلات .. فكل شيء موجود من الإبرة للصاروخ .. عشر تلاف نوع من السيارات والميكروباصات والشاحنات .. موتوسيكلات بانواعها من فسبا 200 لموتوسيكل الهارلي والراسينج لموتوسيكل العادة ، للبوآخر والسفن والعبارات .. وإلى آخره ..

كل شيء موجود ..

ولكن على الرغم من ذلك وعلى الرغم من كل هذه الاختراعات يفاجئنا العلم الحديث بابتكار عجيب جداً قد لا يهمننا من اخترعه بقدر ما يهمننا اننا نعرف هو كان حاسس بآيه وقت ما خطرت في باله فكرة هذا الاختراع !! .. وهذا الاختراع ليس غريباً على الكل .. فهو شيء بتلات عجلات يتحرك في الشوارع الجانبية زي السحلية .. تعرف انه ماشي تحت بلكونتك من الكاسيت الصارخ على اغنيه عمرك ما سمعتها في حياتك و دائماً مليانه ندم وشكوى وترجيع و بيغنيها واحد بيعاني من القيء أو عسر الهضم أو كليهما .. يوجد على هذه السحلية المتحركة كلام وعبارات زي :

"احذر .. السواق مبيتفاهمش" .. "قول يا باسط هتلاقياها هاصت" .. " شغل المساحات وعاكس في البنات" وعبارات أخرى من هذا القبيل .. ويقود هذا (الشيء) شاب محشش أو طفل صغير في طريقه للتحشيش .. و دائماً تجد سائق هذا الشيء العجيب بيتصرف وكأنه سواق مقطورة ضخمه و معاه رخصة دولية ورجل ذا أهمية في المجتمع ..

إذا رأيت هذا الشيء يسير أمامك بهذه المواصفات المذكورة فأعلم يا عزيزي أنك في أحدث اختراع لعالم المواصلات والنقل وهو : التوك توك .. ومتسألنيش يعني إيه (توك توك)؟؟ .. وحت منين الكلمة دي ؟ .. احفظها كده .. لانك لما تبصله هتلاقي مينفعلهوش غير الاسم ده أياً كان معناه .. (توك توك) وبس ..

وأنا لا اعترض على وجود التوك توك ولم اهتم بالضجة اللي طلعت حوالياه بشأن ترخيصه من عدمه أو خطره على الناس الماشيه وإلى آخره .. بالعكس .. انا اكتشفت فيه ميزات فريدة جداً .. أولها أن التوكتوك مش بيمشي زي بقيت وسائل المواصلات اللي خلقها ربنا .. لا .. ده بيتنطط .. زي عربيات الملاهي .. وده في حد ذاته بيشتبع جواك رغبات مكبوتة لو مكنتش قضيت طفوله سعيدة .. ده غير أنك لما بتقعد في الخن اللي ورا بتحس بتوحد فريد من نوعه وكيونونه نادرة ... طبعا مش فاهم يعني ايه توحد وكيونونه بس ده اللي هتحسه فعلاً .. أينعم قدامك بشربين فيه سواق مسجل خطر ممكن يتلفت في أي لحظة ويضربك مطواه في بؤك ولكن ده ميمنعش ان فيه متعه انك تقرب قوي من الارض وتشوف الناس من تحت بعد ماكنت بتشوفهم من فوق وانت راكب الاتوبيس وده في حد ذاته ممكن يقضي على حالة الملل اللي عندك ويعلمك التواضع ..

اول توكتوك ركبته كان في بولاق .. وكنت ماشي فوق كوبري مشاه وشايف مستعمرة للتكاتيك من تحت عاملين زي النمل .. يفادوا بعض ، ويقربوا من بعض ، ويهوشوا بعض ، ويشتموا بعض .. نزلت من الكوبري .. قابلني اول واحد من سائقي التوكتوك وكان شاب مدمن وريحته مقرفه ولافح كوفيه صوف على وشه .. قالي بلهجه مفيهاش مناقشة :

- رايح فين ؟
- زنين ..
- هتركب عادة ولا مخصوص ؟
- مش فاهم ؟
- مخصوص يعني هوصلك لوحداك وهتدفع اتنين جنيه .. والعادة يعني أربعة يركبوا معاك وكل واحد يدفع خمسين قرش ..
- يا نهار ابيض .. أربعة هيركبوا غيري .. لا يا عم .. انا هركب لوحدي .. خد الاتنين جنيه واتكل على الله ..

توجهت إلى التوكتوك الخاص بالأخ وكان مكتوب عليه بخط قبيح :
"روتانا توك توك .. مش هتقدر تمشى على رجليك "

و اكتشفت أن زي ما الشيوعيين والمناضلين بيعتبروا (تشي جيفارا) هو أبوهم الروحي في النضال فسائقي التوكتوك بيعتبروا (عم أنور الراجل اللي بيشتتم) في اعلانات ميلودي هو أبوهم الروحي في قلة الأدب ، لأنه طول مانت راكب هتسمع احلى كلام .. يا ض يا ابن (التييت) خلي عندك (تيتت) دم وخذ دورك .. يا فرحه أمك بيك يا (توووت) يا ابن (التييت) .. ده انا هطلع (تيتت) اللي خلفوك .. وكل الكلام الحلو اللي كان ممنوع عليك تسمعه في طفولتك السعيدة .. أخذ الشاب الي بيسوق نفس بعصية من السيجارة الي كانت ريحتها تدل على أنها كوكيتل من مواد محظورة وقال :

- معلش يا باشا .. هو الواحد لازم يقل أدبه على الخلق دي عشان ياخذ حقه ..
- ربنا يسهلنا جميعاً ..

- أصل انا اهم حاجه عندي الكرامه .. ده أختى سابت خطيبها عشان كان عايز يخطبها من غير موافقته ..

طبعا مفهمتش ايه الفكرة !! .. وعلاقة إيه بمين؟! خطيب مين وموافقه مين؟ .. الواد بايظ .. ودي سمة تانية مميزة لسائقي التوكتوك .. انهم بايظيين ..

بعد عدة أمتار من التنطيط وحاسبي يا بت - وامشي عالرصيف يا حاجه - وكتكوا نيله على ابن التيت اللي ركبها لكو أخذ نفس عصبي من السيجارة الكوكيتل المميزة اللي في ايده وبصلي في المرابه وقال بنفس اللهجة التي لا تقبل النقاش :

- امسك كويس يا باشا الله يكرمك أصل سواقين التكاتك هنا أغيبا قوي ..
- تكاتك؟؟؟ .. حاضر .. همسك يا عم وربنا يستر ..

بص لي في المرابه وقال :

- على فكرة يا بيه معلومة ليك .. اسمها فعلاً تكاتك .. مش تكاتيك زي ما بتقولوها .. دي غلظه شائعه عند الناس اللي معاهم شهادات عاليه زي حضرتك .. اخذ نفس تاني وقال بثقة متناهية :

- وابقى شوفها في الكاموس .. هيقولك كذا توكتوك مع بعض بيتقال عليهم تكاتك ..

- كاموس ايه ؟

- الكاموس .. الكتاب الكبير ده اللي فيه الكلمه والترجمه بتاعتها بالانجليزي ..

وقام باصص لي في السبعين مرايه اللي حواليه لدرجة اني حسيت ان انا قدام عصابة قطاع طرق .. ضاقت عينيه وخذ نفس ملا بيه التوكتوك وقال :

- على فكرة يا باشا ميغركش المنظر الوسخ والخلقة بتاعتي .. ده انا سبعة صنايع والبخت ضايع .. بس هي البلد اللي عملت فيا كده .. بالك .. انا خارج من خمسه ابتدائي يعني اعرف شوية حساب .. العيال القذرة اللي حواليه دول مداسوش تراب مدرسة من اصله ..

قالها وحس بنشوة رهيبية طلبت منه أنه ياخذ نفس سيجارة عميق ولعن الزمن اللي دفن موهبته وعبقريته وخلاه يسوق توكتوك ويبقى ملطشه للي يسوى ولي ميسواش وقام مكمل ملحمة معاناته بوصله غنائية صارخه لواحد مضايق انه قفش مراته ليلة الدخلة مع واحد تاني لكنه سامحها وبعد شويه قتلها عشان مرضيتش تكوي له القميص بتاعه .. انا سمعت الاغنيه دي والله فعلا ولكن مش متذكر كلماتها .. يمكن لان الراجل اتسجن قبل ما يكمل الأغنية..

وبينما التوكتوك العظيم يشق طريقه في مجاهل بولاق .. وفي حارة ضيقة لقيت عربية ربع نقل بتزق علينا بغباوة .. طبطبت على كتف الواد اللي بيسوق وقلت بكل لطافة وجنتله :

- بقولك يا حبيبي .. اللي وراك عايز يعدي ..

- فكك منه؟؟

- يا ابني اخزي الشيطان ده ربع نقل ..

- يا باشا بقولك فكك .. انت مش عايز توصل ... مترغيش كثير ..

واكتشفت هنا حقيقة بشعه أخرى وهي ان سائق التوكتوك عنده كرامه رهيبية بتنقح عليه اكمنه راكب اصغر حاجه في عالم الأشياء اللي بتمشي بعجل ودي بتخليه يحس بعقدة اضطهاد لو حد أكبر من توكتوكه حاول يعدي .. واكتشفت شيء آخر أبشع .. ان الولد محشش قوي ومش في وعيه .. وده معناه انه ربما يكون فاكر ان اللي جنبه دي بسكلته مش عربية ربع نقل .. مرة واحد لقيت الواد بياخذ نفس عميق ويبص في المرايات حاوليه ويقول بغیظ شديد وكأنه في فيلم المهمة المستحيلة :

- انتوا هتكتاتروا عليا ولايه؟؟

- يا ابني يتكاتروا عليك فين .. مهو واحد بس عايز يعدي ..

- واللي على يميني ده مين ..

بصيت يمين ملقتش حاجه ..

- ارمي السيجارة اللي في ايدك دي الله يخرب بيتك ..

كلاكسات من ربع النقل .. التوكتوك عنيد .. صراع التنين والنملة .. مسألة كرامه .. يا نوصل يا نموت بكرامتنا .. كلاكسات .. شتميه .. اباحه .. متحاسب يلا .. وفجأة عملنا حادثه .. وهنا بس اكتشفت ان حادثة التوكتوك مش معناها انه يتخبط زي اي وسيلة مواصلات بتحترم نفسها تتخبط وتقف .. لا .. ده بيتقلب علطول .. لذلك الحادثة في مفهوم التوكتوكايشن هي الانقلاب والشقالباط في الهوا وانك تلاقي نفسك متمرغ في الطينه .. و لكني اكتشفت ده متأخر قوي بعد ما لقيتني انا والأرض حته واحده .. وشهدت ارض بولاق في عام 2008 اتساخ قميصي الجذاب وبنظولوني الحرير وبهدلتي قدام اللي يسوى واللي ميسواش .. وطبعاً نضفت الهدوم على قد مقدر وسط وصلة الاباحه للواد اللي بيسوق وهو بيشتم النقل اللي طلع يجري بسرعه .. قام الأخ السواق وعدل التوكتوك وهو بيسب ويلعن ويتهم الراجل بأشياء تتعلق بذكورته ..

- يا ابني مش قلت لك ارمي السيجارة اللي في ايدك عشان تفوق وانت سابق؟؟
بص لي والادمان اللي على وشه وقال :

- ولا يهملك يا كبير .. حضرتك رايح فين ان شاء الله؟؟

رايح فين ايه؟؟ .. انا راكب معاك من الاول ..
بص لي ولمحت في عينيه كل معاني التوهان :

- من الاول فين يا باشا انت هتشتلغني؟؟!!.. انا طول السكه لوحدي !!

- يا ابني لا .. انا راكب معاك من الأول ودافع اتنين جنيه ..

- اه كده افتكرت خش... طب والي معاك ده دفع؟

- يخرب بيت اللي انت شاربه ده..

ركبت .. وانطلق التوكتوك مرة أخرى في مجاهل بولاق .. قال الولد وهو بيدخن نفس السيجارة الكوكتيل الي مش عايزة تخلص :

امسك يا باشا كويس عشان متقلبش .. ده انا لسه من دقيقتين مقلوب قلبه هباب لو كنت معايا مكنتش هتخرج سليم .. اصل بتوع المطافي دول بيقوا عايزين يعدوا بالعافيه وانا عندي كرامتي اهم حاجه .. عارف اختي!؟

- آه عارفها .. مش دي اللي قتلت خاطيها عشان كان عايز يخطبها وهو مش عايز ..

بص لي باستغراب رهيب في المراية وسحب نفس عميق قوي من السيجارة وقال :

- يا (تيت) أمي .. هو الموضوع انتشر في بولاق للدرجة دي .. سبحن الله ..

وانطلق التوكتوك مرة اخرى في مجاهل بولاق .. كنت ناقماً على أول ركوبة ليا فيه.. ولكن على الأقل بقيت عارف ان حادثة التوكتوك معناها انك تتقلب .. وده في حد ذاته ريحني كثير اني ابقي عارف هيحصلي ايه قبل ما أركب .. وأقسمت أن المرة الجاية اللي هركب فيها توكتوك هركب عادة ومعايا سبعة عشان لما اقع الاقي سفنج ما بيني وما بين الأرض .. وطبعاً .. مش هقع جنب الشباك ..

وتوته توته فرغت الحدوتة ..

أنا وفوزي والداونلووودر

من كتاب فائلة داخلية تتسع لعدة أشخاص



أخبرني أحد الأصدقاء العائدين من أمريكا أنه قادم وفي صحبته الجهاز الذي ينتظره البشر والناس في مصر من شمالها لجنوبها ومن شرقها لغربها .. الجهاز الذي سيقرب الأوضاع ويُحدث الثورات والبراكين .. الجهاز الذي سيجعل كل واحد في مصر سعيد و فايري هابي ومعندوش أي مشاكل في الحياة..

- " إيه هو يا عم فوزي .. تعبتني معاك؟؟؟ "
- قلتها وانا أقدم له كوب الشاي الساخن مع بعض فطائر الجبن البايت ..
- " مش هتصدق نفسك يا معلم " ..
- " انجز وخلص عشان موراييش وقت .. "
- شفت شفطة من الشاي بصوت مقزز وقام لافح في بقه خمس شطائر مرة واحده وقال بصوت متحشرج :
- " أنا معايا جهاز هيقرب الشعب المصري .. الناس مش هتلاحق عليه .. جهاز هـ .. "
- " إيه هوووووووووووه؟؟؟ "
- قلتها صارخاً فسكت دقيقة .. فتح الحقيبة وأخرج بكل فخر جهاز صغير الحجم .. أنيق المظهر .. مربع الشكل .. وقال بفرحة الدنيا كلها وبصوت محشرج من بواقي الفطير عماله تخرج من بقه في منظر مقرف:
- " الفووووووو دا لوووووو "
- " خالص اللي في بقك "
- بلع ما تبقى من الشطائر في فمه وقال بكل انبساط وانشكاح :
- " الداون لوووودر ياباشا ... صديق المصريين أجمعيين .. "
- نظرت للجهاز الصغير بتساؤل وقلت :
- " ده؟؟؟ ... ده ايه ده ان شاء الله؟؟؟ "
- " عندك نت؟؟؟ "
- " عندي "

وقام الصديق موصل الجهاز بفتحة اليو اس بي .. دخل على انت .. وقالى :

- " نفسك تاكل إيه يا معلم؟؟"

- " مش فاهم؟؟"

- "مش لازم تفهم .. أنا عارف أنك بتحب البرجر"

- " برجر؟؟؟.. الكلمة دي مش غريبه عليا!!"

- " مانا عارف انك من ساعة ما اتجوزت مدقتوش"

- " طب ما أنت عارف يا مفضوح .. لزومه إيه تقليب المواجه "

قالها وكتب كلمة برجر في بحث جوجل .. طلعت صور كتيرة لسندوتشات برجر بتلعلط في الشاشة ومليانه لغاويظ كاتشب ومايونيز وسايحة من كل جنب .. فتح صورة منهم وقام عامل دوانلوووود .. نزلت الصورة ..

- " إيه رايك؟؟"

- " رأيي في إيه الله يخرب بيتك .. فين يا ابني الإعجاز اللي بتقول عليه؟؟"

ابتسم ابتسامة غامضة وقام فاتح باب الجهاز العجيب ومد ايده وخرج وفيها

سندوتش البرجر

قعدت حوالي ساعة أو اتنين مش بتكلم .. ومش مصدق .. ومش مستوعب .. وقعت على

الكرسي وكان هيغمى عليا .. قلت بصوت متقطع وكأني واخذ رصاصة في قلبي :

- " فوزي .. الي انا شوفته ده ايه ... ده سندوتش حق .. حقيقي .. ده برجر بجد؟"

- " أيوه يا ابني .. آمال برجر بلاستيك "

وأخذت من فوزي سندوتش البرجر بيدي المرتعشه و قريته مني بكل حرص وكأني شايل طفل

رضيع .. تأملته لثواني .. شميت الريحه باستمتاع .. وقمت لاهط لاهطه كبيرة بنهم رهيب ..

قلت والكاتشب والمايونيز سايحين على بؤي و صدري :

- " هو .. هو يا فوزي اللي في الصورة .. ده برجر فعلاً .. أنا متوهش عنه .. واحشني ابن

الكلب .."

طببط فوزي على كتفي محاولاً تهدئتي .. قلت وانا مرمي على الكرسي كأني واخذ رصاصة في قلبي وبطلع في الروح :

- " يعني .. يعني .. يعني ممكن ... "

- " أيوه يا صاحبي .. ممكن .. "

- " أي مَم؟ .. أي مَم يا فوزي .. "

رزع فوزي فطيرتين في بؤه .. وسحب بؤ شاي وهو يردد بثقة :

- " أي مَم .. أي مَم يا فوزي "

قمت بصعوبة ولفيت حوالين الجهاز العجيب وأنا بحاول أتمالك أعصابي :

- " أنا مش مصدق .. ده اعجاز .. ده حاجه محصلتش .. أنت أستااااذ "

- " تلميذ "

شاورت لجهاز الكمبيوتر عندي بأصابع مرتعشة وقلت :

- " طب بص يا فوزي .. انا حاطط صورة خلفية للديسكتوب .. هاتها كده "

جاب فوزي صورة الديسكتوب لتظهر الخلفية اللي حاططها من ست شهر .. طبق ديك رومي مشوي راقد كالملك المتوج وسط تحابيش السلطة والعيش والبقدونس .. كنت حاسس في اللحظة دي أن الديك هيقفز من المونيتور و ياخذ غطس في بؤي .. تأملت الصورة لثواني قبل أن تنهمر الدموع من عيني وانا أتوسل لفوزي قائلاً:

- " أرجوك يا فوزي .. لو ليا عندك خاطر .. لو أنت صاحبي بجد يا فوزي .. ممكن نحاول نعمله داون لوود للديك ده "

- " يا سيدي حاضر مفيش مشاكل .. متعملش في نفسك كده "

وجلس فوزي بكل ثقته وقام مشاور على الصورة وضاعط داونلوود وقال:

- " بس خد بالك .. هياخذ وقت شويه .. ده ديك .. علبال ما ينزل من النت فيها ساعتين تلاته "

- " طب نزله من غير السلطة والتحابيش اللي حواليه "

- " برضه .. أصل السلطة مش هتاخذ وقت في الداونلوود قوي "

- " طب ماشي .. أي حاجه يا فوزي .. أي حاجه .. ان شالله لو نزل منه (الصدر) بس .. هأكون سعيد .. ده انا مراتي بقالها ست شهر مش عارفه تعمله "

- " ليه يعني؟؟ .. مع ان الديك مش صعب للدرجة دي "
- " مهو عشان اصلا مفيش ديك .. الحال قحط والدنيا طين "
- واجعص فوزي كرجل مهم أمام الكمبيوتر يزيط شوية حاجات في الجهاز في أثناء عملية
الداونلوود .. بعد خمس دقائق من الانتظار قلت له بصوت مبحوح :
- " ما تشوف كده يا فوزي يمكن (الورك) نزل ولا حاجه؟؟ "
- " يا ابني مفيش الكلام ده .. كله هينزل كمان ثلاث ساعات .. اسكت بقى خليني أركز في
الأوبشنز "
- " خلاص يا عم هسكت .. دي الصورة بقالها ست شهر على الجهاز .. مجتش من ساعتين
انتظار يعني "
- وبعد خمس دقائق أخري بصيت حواليا واقتريت من فوزي وقلت :
- " بقولك إيه يا ض يا فوزي "
- " قول يا عيون فوزي "
- " هو الجهاز ده .. هه .. الجهاز ده "
- " ماله؟ "
- " مبيعلمش داونلوود غير لاكل بس؟؟ "
- " اشمعني "
- بصيت حواليا وقلت :
- " يعني مبيعلمش مثلا داونلوود لمز .. لبكيني .. لسكسي جيرلز "
- بص لي فوزي بنظرة رهيبة وقال :
- " لا يا خويا ... التكنولوجيا بتاعته للأكل بس .. ده بيحول الإشارات الكهربائية لمواد عضويه
.. يعني الديك ده انت بيتترجمه لاشارات كهربيا .. والجهاز بيفسر الكهربيا على انها مواد عضوية
و ... "
- نغزته في كتفه جامد وقلت بقرف :
- " يا خويا خلاص .. ده ايه البكابورت اللي فتح مرة واحده ده .. عضوية إيه و فوزيه إيه ..
مكنتش كلمة !! "

- خطفبت بعنف فطيرتين كانوا في طريقهم للفعص جوه بؤه :
- " وبعدين بروح أهلك طالما فيه الجهاز ده .. إيه لزومه تخلص الفطير اللي في البيت ..
متعمل داونلووود للشبراوي وتوفر الطفح اللي عمال تطفحه ده" ..
- " طب اصبر بقى عشان بغير الإعدادات بتاعت الجهاز "
- " غير يا خويا براحتك "
- وهنا رن هاتفني الجوّال .. المدام ..
- " أبوه .. أنا في البيت .. قاعد مع فوزي .. لا متتعبش نفسك في الغدا " ..
نظرت لفوزي بسعادة طاغية وقلت :
- " أصل انا عازمك النهاردة انتي والعيال .. آه .. على ديك رومي .. آه .. لا من غير فلوس خالص .. اما تيجي هشرحك .. يا ستي مصرفتش ولا مليم ده إيه الغم ده .. لأ الفلوس اللي انتي سايبها موجودة زي ما هي .. لما تيجي هقولك .. لما تيجي هقولك بقى "
- قفلت الموبايل في غيظ :
- " ده إيه الدماغ دي .. مش عايزة تفهم خالص "
قلتها واقتربت من فوزي المنشغل .. بصيت حواليا وقلت بصوت منخفض جداً :
- " طب بقولك ايه ياض يا فوزي يا شيطان انت .. "
- " ها تاني؟ "
- " الجهاز ده ؟؟ .. هه .. الجهاز ده ؟؟ "
- " ماله الجهاز ده ؟؟ "
- " زي ما بيعمل داونلووود كده .. مينفعش يعمل آبلوووووود ويرفع حاجه برضه ع النت "
- " عايز تبعت أكل لحد ولا إيه؟ "
- " لا يا عم أبعث إيه !! هو أنا لاقى آكل "
اقتربت منه وقلت بصوت منخفض قوي :
- " أصل أنا كنت بفكر أعمل آبلووود لمراتي "
- " لمراتك ؟؟؟ "
- " آه .. عايزها تروح مترجعش .. تتوه في النت "
- " لا حول ولا قوة إلا بالله .. ياريت لو أقدر يا صاحبي .. "

- رجعت لورا .. سرحت بتفكيري وقلت بحسرة :
- "بس أنا عارف أن أنا حتى لو عملتها آبلوود .. الفاير وول اللي عند الناس عمره ما هيقبلها .. واحتمال لو نزلت عند حد من الناحية الثانية تجيبه فايرس وتحرق له البوردة "
- "يا عم الشبكة عندك بطيئة كده ليه؟؟"
- قلت والههم على وشي :
- "تلاقي حد الناحية الثانية بيعمل داونلوود لحوث ولا حاجه؟؟"
- بص فوزي في الساعة في توتر وقال :
- "بقولك إيه أنا لازم أمشي "
- اتكهرت ومسكته من أرابيزه :
- "يخرب بيتك تمشي فين؟ .. والديك؟ .. والداونلوود؟ .. يرضيك الديك يبجي ما يلاقيك"
- "لازم الحق الطيارة .. مفيش هزار "
- "طب والجهاز؟؟؟"
- "معلش يا صاحبي .. مضطر آخده معايا .. بس إن شاء الله هرجع المرة الجاية من أمريكا بكميات كبيرة .. ده كان مجرد عينة اختبار"
- "لا .. مرة جاية الله يخرب بيتك .. مفيش جاية .. طب بص .. هشتريه منك "
- "يا ابني صعب .. بتقول إيه .."
- "يا أخي لا صعب ولا حاجه .. وبعدين العيال انا عشمتمهم بالديك .. وبعدين مهو فيه منه في أمريكا كثير .. قولي بس .. تمنه كام "
- فكر فوزي شويه وبص لي بندم وقال :
- "300 دولار"
- "حلو .. يعني ما يعادل 300 جنيه "
- "انت بتهزر .. لا .. يعني 1800 جنيه »
- « زي بعضه يا فوزي يا نتن "
- مفكرتش كثير .. سبت فوزي و دخلت الاوضه .. جيت الفلوس ..
- "اتفضل يا باشا .. أنا مش هنسالك الجميل ده يا فوزي طول عمري .. ومش خسارة فيك الفلوس"

حط فوزي الفلوس في جيبه وبصلي بعتاب وقال :

- " خلي بالك من الجهاز .. انا عملت كده عشان انت صاحبي بس "

- " أنت استاذ "

- " مقولنا تلميذ "

بص في الساعة تاني وقال :

- " بص .. ساعة و تفتح الجهاز هتلاقي الديك .. ريح الجهاز شويه بعدها "

- " حاضر "

- " وبص انا حطيتلك اوبشن حلو .. اسمه اوبشن (اديني قطعة) .. لو فيه اكله مش عارف

طعمها ايه ممكن تشغل الاوبشن ده وتداونلوود حته منها .. "

- " وبعدين ؟؟ "

- " ولا قبلين .. حط بؤك قدام الجهاز وهتلاقي القطعة خرجت منه واتزفلطت في بؤك .. لو

عجبك الطعم اعمل داونلوود للباقي "

- " حاضر "

أخرج من جيبه ورقه واديهاني وقال :

- " آخر حاجه .. ده نمرة تليفون واحد كان جي من امريكا معايا .. أي حاجه تحصل في

الجهاز اتصل بيه "

- " حاضر .. انا متشكر قوي يا فوزي .. بجد مش عارف أقولك إيه "

وانصرف فوزي ..

وذهبت للجهاز أنا في قمة السعادة والانبساط ..

أعد الثواني والدقايق ..

مستني حبيبي يخرج بالسلامة ..

عدت ساعة .. لا حس ولا خبر ..

مكنتش عارف الجهاز ده بيقول أنه خلص داونلوود ازاي .. لا فيه نور ولا لمبة ولا رساله ..

عدت ساعه ونص .. مفيش حاجه .. ومفيش حتى ريحه ..

ساعتين .. ثلاثه .. لا كثير .. العيال زمانها جاية .. ومصيبة لو ملاقوش الديك ..

وفتحت الصندوق في قوة ..

مفيش حاجة ..

صُعقت .. يكونش انت بطيء وأنا اللي استعجلت ..

كلمت فوزي .. مغلق ..

طلعت الورقة اللي ادهاني فوزي وضربت نمره التليفون .. الحمد لله .. حد أخيراً رد.. قلت:

- " سلامو عليكو "

- " وعليكم السلام "

- " والله يا أفندم أنا كنت بعمل داونلووود لديك رومي من ع انت وكان الوقت المحدد ليه 3

ساعات .. ودلوقتي بقالي خمس ساعات لا حس ولا خبر "

- " آه وبعدين؟؟ "

- " ولا قبلين .. أعمل إيه .. استني شويه ولا إيه "

- " متعملش حاجة .. خش نام "

- " مش فاهم "

- " يعني مفيش ديك .. أنت الي طلعت ديك يا ديك "

صُعقت ..

كان هيغمى عليا ..

- " أنا مش فاهم حاجة قصدك إيه؟؟؟ "

- " قصدي أن أنت انضحك عليك .. وفوزي اداك الجهاز ووهمك انه بيعمل داون لوود لأي

أكل انت عايزه "

- " أيوه .. واداني نمرتك وقالي ان انت بتاع الصيانة "

- " أنا لا بتاع صيانة ولا حاجة .. أنا اتنصب عليا زيك بالظبط .. الفرق الوحيد اني كنت بعمل

داونلووود لسندوتش طعمية من غير طحينة .. مش ديك بحاله يا طماع "

صُعقت وحسيت بأعصابي بتسيب مني .. قلت :

- " بس ده جربه قدامي .. وفعلا عمل داونلووود لبرجر .. أيوه وانا دقته "

- " أنت اللي قتلته انك عايز برجر؟ "

- " لا "

- "بالظبط .. هو اللي اقترح البرجر .. السندونش كان موجود في الجهاز من الأول وجابة قبل ما يجيلك .. وانت مش هترفض .. لأن البرجر حاجه معروفه وسهله ومترفضش .. وآهو اسمه بيحرب الجهاز .. انما لو انت اللي كنت صممت على أكله بعينها كان هيتفضح ويتكشف قدامك"

- " يا ابن الكلب يا فوزي "

- " الله يعوض عليك "

وقفل الراجل السكة وسابني في مصيبيتي .. شلت الجهاز وبصيت .. ازاي مخدتش بالي .. ولا فيه سلك ولا كهربا ولا أي نوع من أي حاجه .. مجرد صندوق حديد أبيض .. لعنت فوزي واللي جابوه .. العيال وأمهم زمانهم جايين ومتوقعين الديك يكون موجود .. رحلت للجهاز طبعت صورة الديك .. مش مشكله .. العيال تبص لصورة الديك لحد ما يشبعوا .. ويحمدوا ربنا أنه ديك بالألوان .. مش أبيض وأسود ..

المشكلة الأكبر في مراتي .. عمرها ما هتصدق أنني اشتريت سندوتش برجر ب 1800 جنيه .. الموبايل بيرن .. يارب يكون فوزي ضميره أنه ورجع لعقله .. رديت بلهفه :

- " آلو .. مين؟؟؟ .. "

- " مساء الخير "

- " مساء النور .. مين؟؟؟ "

- " أنا توتو "

- " توتو مين؟؟؟ .. عايز إيه؟؟؟ "

- " أنا كان مستر فوزي معايا من شويه وباعلي جهاز بيعمل داونلوود لسكسي جيرلز .. وانا بقالي ساعتين و مستني شارون ستون بالبكيني تطلع من الجهاز ومطلعتش .. هو اداني نمركت وقال لي انك بتاع الصيانة .. وأنا .. "

- " يا أخي طلعت روحك .. كليييييييييبيك "

قلتها وقفلت في وشه السكه بعنف .. يا ابن الكلب يا فوزي يا نصاب .. ده مش بينصب بس ده بيتسلى كمان ..

توجهت إلى جهاز الكمبيوتر في شغف .. دخلت النت وكان أمني حاجه واحده بس .. اني
ألاقي البرنامج اللي ممكن يعمل آبلووود لمراتي .. عشان تتوووووه في النت للأبد ومرتجعش..
وكنت واثق إنني هلاقيه ..

الجنيه أبو شفايف

من كتاب فائلة داخلية تتسع لعدة أشخاص



أعتقد أن الجنيه المصري هو العملة الوحيدة التي تغري حاملها بالكتابة عليها دون ندم .. فالجنية المصري بقي ملطشة لكل أنواع الكلام .. كلام حب ما بين اثنين .. إهداء من أستاذ لطالب مجتهد .. ذكرى تافهه لشباب سيس .. وهكذا .. ولا يحدث هذا في أي مكان بالعالم سوى مصر .. فمهما حدث ومهما بلغ حب الشاب الياباني لفتاته اليابانية فهو لن يُخرج الـ (ين) الياباني ويكتب عليه بحبك يا هوسوكاوا يا أحلى عيون مسحوبين في بر اليابان كله .. ووده مش لان بنات اليابان كل عيونهم مسحوبين وفي حالة نعاس دائم .. بل لأن المواطن الياباني يقدس عملة بلده و يحطها فوق اي اعتبار ولو فوق ارتباطه بهوسوكاوا ذات نفسها .. وكذلك لن يقوم الشاب الامريكي بإهداء فتاته الأمريكية الشقراء الناعمة ورقة من فئة المائة دولار مكتوب عليها كلام مثل:

My love .. I die in your mother .. I love you the love of years

أو "حبيبي .. بموت في أمك .. بحبك حب السنين»
لا اعتقد .. فحب السنين والتين وكل هذا الكلام العجيب لن تجده مكتوباً إلا على الجنيه المصري .. لا (ين) ولا (يورو) ولا أي عملة في العالم .. فقط في مصر .. ولا أعلم لماذا الجنيه عن دون عملات العالم .. ما الذي يريد ان يثبت الحبيب لحبيته بكتباته على الفلوس .. انه مستعد يضحى مثلاً؟! .. انه مش فارق معاه خالص؟ .. مش عارف .. ما لاحظته هو ان قيمة العملة كلما كانت كبيره كلما كان الكلام راقى وكلاس .. يعني ورقة الـ 200 جنيه ممكن تلاقي تامر اللي ساكن في الزمالك بيحب سارة من المعادي ومديها 200 جنيه هدية الفالانتاين وعليها اهداء بالانجليش ولا بالفريش ولا بالايطاليش ولا بالتشيكوسولوفاكيش و ده طبعا غير الدبدوب الغتت اللي معدي تمنه شيء وشويات .. والملحوظ أنه كلما قلت قيمة العملة كلما انحدر مستوى الكلام .. لأن مستوى الشخص اللي بيضحى بورقة بمتين جنيه غير اللي بيضحى بمية غير اللي بيضحى بعشرة .. وبالتالي لما توصل للجنيه الورق هتلاقي عليه ازبل كلام ممكن تسمعه او تشوفه .. ولذلك فئة الجنيه هي فئة المسحوقين في المجتمع .. هتلاقي واد حُرْفِي بيحب بت في ثانوي او واد ضايح بيحب بت شمامة .. وفي الاخر برضه البنت ضحت بالجنيه

- بدليل انه وصلني وشوفت الكلام المكتوب عليه - عشان تشتري ورق تيواليت او كيسين بوزو من اللي بيطلع فيهم كوبونات ..

تذكرت هذا الكلام لأنني تعرضت لموقف محرج للغاية منذ شهر واحد في احد كافيهاات جامعة الدول .. في هذا اليوم كنت اجلس وحيداً كأى شاب وسيم في احد الكافيهاات الفاخره .. معايا لاب توبي الفاخر و فلاشتي اللي مدفعتش فاتورتها وقدامي الكابوتشينو من اللي عليه لغاويظ ورغاوي كثير .. وكأى شاب وسيم وجنتل في نفس الوقت (ودي نادرة الحدوث .. الوسامه والجتله مع بعض في نفس الشخص) حبيت اني ادفع الحساب .. عداني العيب طبعاً ... طلبت الحساب .. جه الحساب .. حطيت الفلوس ومعاها واحد جنيه مصري لا غير بقشيش .. اخدها الواد الذوق اللي كل شويه يظمن ان كله تمام والكابوتشينو حلو ونتمنى نشوف حضرتك والكلام اللي ميبأكلش عيش ده !!

دقايق ولقيت واحد بزي مختلف باين عليه الماناجر (او مازانجار مش عارف) بيناديني ويقولني : ممكن كلمة لو سمحت ..

وكأى شاب وسيم قمت .. ابتسم المدير ابتسامه لطيفة جدا وقالني :
" آسفين لتعطيل حضرتك "

قلت :

لا .. ميهمكش ..

قام طلع الجنيه وقال

" ممكن تقولي ده ايه "

بصيت للجنيه وقلت :

" ده جنيه .. تبيز .. بقشيش .. ايه المشكله؟ "

قال المدير :

" متشكرين لذوقك .. بس مقصدش .. بص فيه كده "

اخذت الجنيه وبصيت .. وساعتها اخدت بالي .. الجنيه مكتوب عليه كلام واضح انه من شاب صايح - الصراحه صايح قوي - لبنت واضح انها بتشم حاجات مش كويسه ... الجنيه مكتوب عليه بخط بأزبل خط في الكون ..

" بحبك يا عفت يا أحلى شفايف "

وبجوار هذه العبارة توجد رسمة شفايف بالقلم الجاف واضح انها شفايف وحيد القرن وليس لها صلة بالشفايف الآدمية..

وبمجرد ما قرئت العبارة مقدرتش امسك نفسي من الضحك .. ابتسم المدير .. بينما كان الشاب اللي بيقدم المشروبات بينظر ليا نظرة وحشه قوي وكأني شتمته شتيمه قدره ..اعتذرت للمدير و اخرجت له جنيه نضيف شيك اخر حلاوة من غير شفايف .. اخذ المدير الجنيه بكل ذوق ولو أنني مفهمتش ايه الي زعله قوي كده .. ولقيته بينظر للشاب بابتسامه مرضيه وهو يقول :

خلاص يا ابني الموضوع واضح انه طلغ صدفة والراجل ميقصدش ..

هنا خطر في بالي خاطر رهيب .. بصيت على البادج اللي على قميص الشاب اللي بيقدم المشروبات لقيت مكتوب:

Effat Mahmoud
Costa Hall Waiter

أو بالعربي :

عفت محمود ..

مقدم مشروبات..

وهنا ارتعبت رعب الدنيا كله وفهمت نظرة الكراهية في عيون الاخ (عفت) اللي بيقدم المشروبات .. الموضوع مش مجرد كلام مكتوب على الجنيه .. ده بيتهمني بالتحرش .. والموضوع كله صدفة لا تتكرر واحد في المليون وممكن اي حد يصدقها لان اطراف القصة كلها مترابطة :

" شاب وسيم وحيد معاه لاب توبه وبيشرب كابوتشينو بالرغاوي اللي هو انا" ..

"جنيه بقشيش مكتوب عليه (بحبك يا عفت يا احلى شفايف)" ..

"واحد بيقدم الطلبات اسمه (عفت) (بغض النظر عن شفايفه)" ..

يعني تهمة التحرش بـ (عفت) لابساني لابساني...

وكأي شاب وسيم وجنتل اعتذرت للجميع ..اخذت الجنيه ابو شفايف ومشيت بسرعة البرق ومرحتش الكافيه تاني خالص ولو اني هفتقد الكابوتشينو ابو لغاويظ ورغاوي كثير ..

لعت كل اللي بيكتبوا على الجنيه والخمسة الجنيه والمية جنيه .. بصيت للجنيه وانا خارج من باب الكافيه .. صدفة عجيبه فعلا .. (بحبك يا عفت يا أحلى شفايف)!!؟؟!! .. وتحت مكتوب بخط رفيع قوي .. (حببيك تامر) .. الطبيعي والمفهوم ان (عفت) يبقى بنت .. خطر لي خاطر مفاجئ ان اللي فيه الجنيه برضه يطلع ولد مش بنت و اسمه (عفت) .. بس ازاي ؟ .. هل ممكن ولد اسمه تامر يكتب لولد اسمه عفت اهداء كده!!؟؟!! .. مش عارف .. عن نفسي انا ياما زمان كتبت اهداءات لزمايلي على الكرايس وكتب الدراسه مع تمنيات بالتوفيق والنجاح انما عمري ما جبت سيرة شفايفهم بصراحه ..

طلعت الموضوع من دماغي تماماً .. وكأي شاب وسيم ركبت سيارتي الفارهة .. وكأي شاب وسيم دورت المحرك .. واول ما جيت اتحرك لقيت شخصية بتجري من بعيد و بيصفر صفاره مزعجة كأني خطفت عيل من عياله ..

– مساء الفل يا باشا ..

طلعت جنيه معدن واديتهوله ..

بص في الجنيه وبصلي بصره رهيبه وهو يقول:

ايه ده يا بيه؟؟

خطفت الجنيه منه وقعدت ابص فيه ليكون محفور عليه اهداء كده ولا كده ... ملقتش .. قلت له:

خير؟؟

قالي : عايزين اتنين جنيه يا بيه .. هو الجنيه يعمل حاجه في الزمن ده؟؟

قلت له : يعني الاتنين هم اللي هيعملوا ..

ناولته الجنيه المعدن .. ومعاه الجنيه بتاع عفت .. لقيت الساييس بيحمد ربنا وبيوس الجنيه ابو شفايف وقعد يبص له فترة طويله .. وكأي شاب وسيم – وتفادياً لسوء الحظ مرة أخرى – انطلقت بسيارتي الفارهه وانا مطمئن المرة لان كنت متأكد أنه حتى لو الساييس ده طلع اسمه عفت ..

فبالتأكيد شفايفه مش هتكون احلى شفايف ..

مبروک یا حمدین ..



قبل الانتخابات انتشر فيديو للأستاذ حمدين صباحي يعرض فيه اقرار ذمته المالية للناس ، وما يمتلكه من أموال و أصول . في الفيديو اللي كان عالموقع ده : <http://bit.ly/Ilg2y6> كان بيؤكد صباحي إنه عنده سبعتلاف جنيه في البنك الأهلي .. خمس فدادين ورتهم من السيد الوالد رحمة الله عليه .. وعربية سكودا قديمة موديل (98) .. لوهلة حسيت أنه راجل عنده حاجات بسيطة كده لو عرف انه فاز في انتخابات الرياسة ممكن يحصله حاجه .. حوار زي اللي جي ده كان تخيلته أيام انتخابات الرئاسة .. رئيس لجنة الانتخابات بيتصل بحمدين صباحي عشان يبلغه بفوزه بالرياسة بس مش عايز يقوله الخبر مرة واحده عشان ميطبش ساكت ..

- السلام عليكم
- وعليكم السلام ورحمة الله وبركاته ..
- حمدين ؟
- يا نعمين ..
- أنا المستشار (.....) رئيس لجنة الانتخابات ..
- يا أهلا وسهلا .. يا أهلا وسهلا يا سيادة المستشار ..خير؟
- انا بتصل بيك عشان اقولك على حاجه مهمه جدا .. مهمه قوي قوي ..
- (يسكت حمدين لبرهة من الوقت ثم ينادي على ابنه): واد يا هيشم .. خدي واد شقة البطيخ دي اما نشوف سيادة المستشار عايز ايه .. اتفضل يا أفندم ..
- لا مش بالسهل كده .. أنا عايزك أنت بقى تخمن ايه هو !!
- هو خير حلو ؟
- ايوه حلو ؟
- حلو قوي يعني؟
- حلو قوي قوي كمان ..
- لقيتولي بيعه للعربية الاسكودا !؟
- بقى رئيس لجنة الانتخابات هيكلمك ويقولك لقي بيعه للسكودا .. لا يا حمدين .. خبر اجمل واجمل ..

- او عي يكون هو اللي انا مستنيه؟

- هو يا حمدين ..

- يا كرم الله .. يا كرم الله .. الله أكبر .. الله أكبر .. حازموووووووون ...

- الف مبروك يا حمدين .. واللجنة هتعمل اجتماع عشان نحدد معاد مراسم التسليم وكل اللذي منه ..

- وكمان مراسم تسليم أنا مش مصدق .. طب والنبي بسرعه لحسن عايز انقل من البيت ده ..
وادخل الواد مدارس تجريبي بدل مدارس الحكومة دي .. والبت عايز اجهز لها الشقة اللي هتجوز فيها ..

- هو احنا هنبتي نستغل نفوذنا من دلوقتي يا حمدين ؟

- مش حقي يا سيادة المستشار؟

- حق مين يا محترم .. ده مال الشعب !!

- مال الشعب ايه يا سيادة المستشار .. ده مالي أنا ؟

- مالك انت؟ .. انت بتتكلم عن ايه يا حمدين ؟

- عن السبعترلاف جنيه اللي ليا في البنك الاهلي ؟

- مالهم ؟

- مش فازوا في السحوبات اللي عليها عشرة في المية فايده مع (مكنسة) و (سي دي رايتز)
هديه ولا قصدك ايه؟؟

- لا حول ولا قوة إلا بالله .. سحب ايه وبتاع ايه يا استاذ حمدين .. متركز شوويه ..

- والله مركز يا سيادة المستشار بس اعذرني لأنني قلقان عشان نتيجة الإنتخابات .. ومستني

قوي تليفون حضرتك اللي تقولي فيه اني فزت بالرياسة .. بس حاسس انه التلفون ده مش

هيبجي خالص .. مش هيبجي . مش هيبجي .. مش هيببيجي ..

- لا حول ولا قوة إلا بالله .. انت مالك بقيت عامل كده ليه يا حمدين ..

- اعذرني يا افندم .. حملتي كانت غير ممولة ومقدرتش اروح محافظات كثير في وجه بحري

والدلثا عشان اعرفهم بيرنامجي الانتخابي ده غير انه ولاد الكلب غلوا اجرة الميكروباصات نص

جنيه .. وديني لا قطع عنهم البنزين .. حاسس اني هفشل يا افندم .. حاسس اني هفشل ..

- ولو قتلتك يا حمدين اني بتصل بيك عشان اقولك انك مفشتلتش .. ومعايا الخبر اللي انت مستنيه ..
- مش معقول ..
- لأ معقول ..
- يعني مديتو فترة الإنتخابات لحد ما اروح وجه بحري والدلتا ..
- اللهم ما طولك يا روح .. لأ ..
- السواقين رجعوا الأجرة رجعت زي ما كانت ؟
- لا حول ولا قوة إلا بالله .. بص يا حمدين ..
- يا نعمين
- انا المستشار (...). رئيس لجنة الإنتخابات .. ومعايا ظرف لسه واصلني حالاً من اللجنه و فيه اسم المرشح اللي فاز .. وأنا كلمتك انت .. وبقولك عندي خبر ليك ... يبقى ايه..
- بس خلاص (بيكي حمدين بكاءً حاراً متأثراً...)
- الحمد لله اخيراً فهمت يا حمدين
- يتجمع أولاد حمدين حوله ..
- خير يا بابا .. مالك ...؟؟
- ولاد الكلب ..
- مالهم يا بابا ..
- استبعدوني !!!..
- خبر عاجل : وفاة رئيس لجنة الإنتخابات وأعضاء اللجنه جميعهم بالسكته القلبية ..

تمت

*نحترم الأستاذ حمدين صباحي ونقدره والمقاله للدعابه لا أكثر ..

بس أنا كسفير .. اتبسطت



في رمضان 2011 قام أحمد الشحات بإنزال العلم الاسرائيلي من فوق السفارة الإسرائيلية ..
التالي هو : المكالمة التليفونية التي جرت بين نتياهو والسفير الاسرائيلي بعد نزع العلم ..

- آلو .. مين ؟ ..
- انا السفير كوهين ..
- اهلا صباح الخير يا كوهين ..
- صباح النور يا ريس ..
- بلاش ريس دي .. مش بتفائل بيها .. انت شوفت اللي حصل لمبارك ..
- حاضر يا ريس ..
- ارغي ..
- حاجه غريبة .. النهاردة الصبح حلقت دقني وركبت مكروباص الجيزة عشان اروح الشغل ..
- طلعت السفارة .. ببص من الشباك ملقتش العلم بتاعنا ..
- ملقتش العلم بتاعنا .. امال لقيت ايه ؟
- علم مصر ..
- ..**aازاي ؟
- والتوراه زي ما بقولك كده
- متحلفش يا كوهين
- يا ريس بقولك والتوراه .. مش مصدقني ليه ؟ ..
- دي شكلها هلاوس صيام يا كوهين .. انت مش انت وانت جعان
- طب والنعمه
- ايه ده .. انا فعلا شايف الخبر قدامي اهو .. احمد الشحات .. ده طلع عشرين دور ابن الجنية ..

- مش قلتلك ..
- والكلام ده حصل امتي ..
- امبارح بالليل ..
- ومكلمتنيش ليه في وقتها .. جي تكلمني الصبح ???
- ماهي الساعة المجانية بتاعت فودافون مكنتش لسه نزلت ..
- طب ده كده السفارة مفيهاش علم .. فقدت هويتها .. مفيش اي علم تاني عندك نحطه؟
- لا
- والعلم الصغير اللي على مكتبك ؟
- امبارح لما اتسحرت جالي اسهال .. المية كانت قاطعة .. ملقتش حاجه امسح بيها .. قمت مسحت بالعلم ورميته ..
- يا كوهين يا زباله .. طب اطبع خلفية اللابتوب بتاعك وحطها ..
- معقول يا ريس احط صورة اليسا ..
- طب بص .. مش مهم العلم .. خد بالك انت بس من نفسك لحد ما نبعت يجيبك ..
- هتجيبوني ازاى يا ريس .. ده انا في الدور العشرين ومش عارف انزل ..
- فعلا دي مشكله ..
- معندكوش ناس تطلع الطلعة بتاعت احمد الشحات ..
- لأ .. عندنا ناس بتعمل السحبة بتاعت مايكل جاكسون ..
- والحل !؟
- هنبعتلك فرقة صاعقة ينزلوك .. بس اهم حاجه يكون الاسانسير شغال وبمروحة .. عشان مبقوش يتسلقوا زي زمان ..
- فيه صاعقة بيطلعوا في اسانسير ؟
- مقولنا مش قادرين يتسلقوا .. عندهم تسلخات في الفخدين ..
- تسلخات؟؟
- آه ..
- همه بوكسراتهم ايه ..
- شمعونيل ..

- طب خليهم يجربوا قطنويل ..
- ده عند ام نبيل ..
- قطنويل ممتاز يا ريس .. واحنا اليومين دول عايزين حاجه تلزق فينا وتزق متطلعش .. النهاردة
- اخدوا العلم .. محدش عارف بكرة هياخدوا ايه ..
- خلينا في المهم ..
- يا ريتني كنت موجود امبارح و الولد كان بينزل العلم .. كنت قتلته ينزلي معاه بدل الحبسة دي ..
- لا يا كوهين برضه متضمنش ..
- مضمنش ايه ريس ..
- اللي يتسلق عشرين دور مرة واحده متعرفش لو دخل عليك ممكن يعمل ايه ؟
- تفتكر ممكن يعمل ايه يا ريس ..
- اللهم ما اني صائم .. بلاش ..
- طب والعمل ..
- انا بقول نفجر السفارة ونغسل عارنا يايدينا ..
- هتموتوني يا ريس !؟ ..
- متقلقش يا كوهين .. هتبقى بطل .. و مفيش عذاب قبر في رمضان .. هتصحى هتلاقي نفسك في جهنم عدل ..
- انت جامد (تل ايبب) يا ريس ..
- اصلي يا كوهين ..
- امال ايه الدوشة اللي عندك دي ؟
- دي المظاهرات يا كوهين .. بيهتفوا ..
- بيهتفوا ؟
- يقولوا الشعب والموساد ايد واحده .. و نتياهو مع نفسه .. شوفت يا كوهين انا ابقى مع نفسي؟
- و هتعمل ايه ؟

- هنزل وحدات من الجيش .. دبابات .. وطائرات اف 16 .. وقنابل مسيلة للعياط ..
- طب انا جايلك بكرة ..
- ليه ؟ ..
- هتصور مع الدبابات ..
- الدبابات رجعت مكانها .. فيه قنابل عنقودية .. وغازات سامة ..
- خلاص هتصور مع المجددات المهليات ..
- خلاص ماشي ..
- هسيبك بقى يا ريس عشان الساعة بتاعت فودافون المجانية قربت تخلص ..
- قشطة يا كوهين .. رمضان كريم ..
- الله أكرم ..

كليك

الأيادي الخفيه التي تعبت بنطلوناتنا

من كتاب فيها لا مؤاخذه حاجه حلوة



بعيداً عن الإعتصامات والإحتجاجات و السحل و التدمير بقيت حاسس إنه فيه أيدي خفية أخرى يملكها طرف ثالث تنبثق منه أصابع مندسة تعمل على العبث بمفاتيح كل زوجين سعيدين في مصر - إن وجدا - و خرب كل بيتين هادئين في الوطن العربي عموماً - ان وجدا برضه ... ففي الفترة الأخيرة عكف مسئولونا الإعلاميون على حقننا بحقن حراقة من مسلسلات الحب التركية والمكسيكية واللبنانية و اللي بيفط منها اللامور من الشاشة فط ويطلعلك لسانه ويقولك يا اللي معندكش لامور في بيتك أنا بقى عندي جوه .. فهذه المسلسلات تسببت في خرب البيوت في كل أنحاء مصر بدءاً من الإسكندرية شمالاً حتى أسوان جنوباً ومن بني سويف غرباً حتى آخر فيصل شرقاً ..

ولا علم لي كيف استطاعت هذه المسلسلات النفاذ إلى قلوب الزوجات المصريات والعربيات بهذه الطريقة الناعمة .. فتحت وطأة العاطفة الجياشة والحب الملائكي بين (مهند و نور) وبين (اليخاندر و ماريا) و بين (فرناندو و رزاليندا) صارت الزوجة المصرية حائرة وتائهة وضائعة .. فمع كل مشهد رومانسي تتحسس تلك الزوجة قلبها باحثاً عن الحب فلا تجده بينما يتحسس الزوج بطنه باحثاً عن الأكل فيجده في الثلاجه ، و مع كل تنهيدة من الزوجة تقابلها تشخييره من الزوج ومع كل دمهعه منها تقابلها سبة منه ، و كلما نظرت الزوجة إلى زوجها بعيون دامعه كي تستحثه على احتوائها و ضمها إليه يختلس الزوج النظر بألم إلى كرشه ليذكرها بأن هذا الكرش هو الحائل الذي يحول بينه وبين احتضانها مسيرة عامين وأنت نازل كده من البطن وطالع على السرة ومنها إلى كرش الزوجة نفسه .. وبأنه - أي كرش الزوج - هو الذي قتل العاطفة قتلاً بعد أن استمر في التضخم وفضل يقب لفووووووق (بعد ان استنفذ مساحته من القبيان لقدام) حتى وصل للقلب نفسه ففحص مركز الحب فيه فعص السنين ليموت اللامور بداخل صدر الزوج التخين و بحيث لم يعد مجدياً احياءه من جديد و لتنتهي الرومانسية بين هذين الزوجين تماماً مع انتهاء المسلسل التركي بنصف مليون حالة طلاق في مصر منهم 2 مليون زوجة انفصلوا فعلاً والباقي سابوا بيوتهم وباتوا عند أهاليهم في بولاق أبو العلا ..

وهي إن صلة الرحم عندهم عالية جداً .. أي والله .. كله الناس بتحضن كل الناس بطريقة تضايق كل الناس .. وعشان كده بيحتوي المسلسل المكسيكي على عدد لا بأس به من الأبناء غير الشرعيين اللي مش عارفين تبع مين دول .. تبع ايخاندرو و لا ماريا ولا مهند ولا المخرج ولا المنتج ولا أنهي مدعوق اللي عمل عملته المهيبة دي و هرب .. والأنييل إن الأب ممكن يكون هو نفسه عم الولد ابن الخطيئة ده .. وممكن يكون برضه أخوه أو أمه أو بنت خالته .. وارد جداً .. وعموماً بتخلص معظم المسلسلات المكسيكية إما بالزواج العرفي أو بانتحار كل الممثلين .. أما الأبناء غير الشرعيين فيبدوروا على عقود عمل في مسلسلات مكسيكية أخرى من نفس القطعية ..

و عشان منبعدش كثير أنا بصراحه مش عارف ليه الرومانسية ماتت ما بين الرجل المصري والمرأة المصرية؟! .. وليه لجأت الزوجة للحصول على الحب من المسلسلات التركية والمكسيكية .. وراح فين أصلاً الحب البريء والإعجاب بين الشاب والفتاة في مصر .. أنا أذكر زمان لما كان الواحد بيعجب بواحد كان بيقوم مقرب منها و يقولها الكلام الجميل اللي كنا بنسمعه ونشوفه في الأفلام :

" أنا معجب بيكي و عندي كلام كثير عايز اقولهولك يا ريت نقعد في حتة هادية عشان اقدر اصارحك بمشاعري" ..

.. مش عارف ليه دلوقتي معادش فيه كده؟؟ هل عشان مبقاش فيه إعجاب اساساً .. ولا عشان لما يقرب منها وهيبتدي يكلمها بيلاقيها مطلع السيلف ديفنس وباخاه في وشه جاياله عاهة مستديمة في مناخيره في ظل الظروف المقندلة اللي احنا فيها .. ولا عشان الحنت الهادية اللي عايز يصارحها فيها بمشاعره بقى المينيم تشارج بتاعها غالي السنين فيختصر ويقوم طالع بالبت المقطم أو كاتب عليها عرفي حيث لا مينيم تشارج و لا دياولو وإنما ورقة بتتكتب ووراها موال أزرق .. ورغم كده كثير من اللي أعرفهم قالولي إن العاطفة بتموت عند الراجل لأنه بيكتشف إن الجواز كان العائق الأكبر لطموحه .. فبتحصله صدمة عصبية .. واللي أثبت لي الكلام ده إن أحد الاصدقاء قالي إنه طموحه قبل الجواز كان بيتلخص في إنه يترقى في الشغل ويحجب فلوس ويكمل دراساته العليا في أوروبا أو أمريكا .. لكن من ساعة ما اتجوز راحت الحاجات دي كلها و بقى غاية طموحه إنه يلاقي عيش من أبو سمس في الفرن اللي تحت

بيته ..

وفي النهاية أتمنى من الله أنه يهدي سر الجميع ويرجع الرومانسية للأزواج والزوجات بعد ما يكسبهم مناعة ضد كل المخططات .. حيث إن إعلامنا الخبيث لا يهدأ ولا يكل ولا يمل .. فلهؤلاء الأزواج الحلايف اللي محوقش معاهم (الحب التركي) أو (اللامور المكسيكي) بيقدم لهم الإعلام حالياً ما يسمى بـ : (الققع المصري) و المتمثل في توفيق عكاشة و عمرو مصطفى و أحمد زبايدر و ده للي عشان متخربش بيته أهو على الأقل يتقطع خلفه بعد ما يجيله القولون العصبي و الشلل النصفي ..

ربنا يهدي سر الجميع .. و يبعد الأيادي الخفية .. عن بنطلوناتنا .. وبنطلوناتكو ... قولوا آمين .. وكل عام وأنتم بخير ..

أحفادنا اللذين سيأتون بعد 150 عاماً..

انبوكس بليز

من كتاب فيها لا مؤاخذه حاجه حلوة



تخيّل جدلاً أنه بعد مائة وخمسين عاماً من الآن - أي في عام 2160 - وبعد أن تكون أنت - أطال الله عمرك - قد رحلت عن العالم .. أن أحد أحفاد أحفادك - الذين لم و لن يرؤك - يقوم فجأة عن (لاب توبه) و يركض إلى والدته ويشدها من أكمامها في قوة مخبراً إيها عن مفاجأة غريبة .. وهي أنه في أثناء البحث الذي يقوم بإعداده في مادة التاريخ عن الثورة المصرية التي قامت منذ مائة وخمسين عاماً ، قد عشر في الفيس بوك على صورة نادرة من أيام الثورة بها (تاج) لجدّه الأكبر ، الذي هو أنت ، وقد بدوت حينها شاباً جذاباً في العشرينات أو الثلاثينات من العمر ، وربما أقل من ذلك أو أكبر بقليل ، فائز الحيوية والطاقة ، يقف في اعتداد مع الثوار الرياضيين في ميدان التحرير ، تعلق وجهك ابتسامةً تحاول ألا تبدو ساذجة .. بيدك اليمنى علم مصر يرفرف في السماء عالياً وفي اليد الأخرى لوحةً كتبها أنت بخط يدك ترجو فيها مبارك الرحيل لأن ابنك (الذي هو أحد أجداد الصبي) على وشك القدوم للعالم ولا يريد أن يراه ..

بأصابع حفيدك الدقيقة ، و بضغطة ماوسٍ واحدةٍ على (التاج) ، سيظهر بروفايلك له .. بروفايلك التائه الذي تركته أنت منذ عشرات الأعوام بعد رحيلك عن هذا العالم ولم يعثر عليه أحد .. سيبدو قديماً وكأنما يعلوه الغبار .. تتابع ضغطات الماوس في فضول ليتصفح حفيدك في سرعةٍ تاريخك وعاداتك و اهتماماتك وأدق خصوصياتك .. كل الصفحات والجروبات والايفنتات التي انضمت أنت إليها منذ مائة عامٍ أو أكثر .. سيضحك لستاتس ساخره قلت فيها أن البلد بايظة ومش نافع له لأن هناك من لا يزال يريد ترشيح المرحوم طنطاوي للرئاسة .. سيرى الوقت الذي قمت فيه بتغيير صورة بروفايلك إلى (نعم) أثناء التعديلات الدستورية ومشاجراتك في الكومنتات مع من قالوا (تؤ) .. سيعثر على صورةٍ عمرها أكثر من مائة عام بها اصبعك البمبي ومشاركتك الإيجابية في الاستفتاء .. و سيكتشف مزيداً من (الفوتوز) لك مرابطاً في ميدان التحرير و معتصماً أمام وزارة الدفاع و مطالباً بالإفراج عن المدنيين الذين يُحاكمون من قبل المجلس العسكري .

.. وهو المجلس الذي لم تستطع كتب التاريخ التي يدرسها حفيدك أن تمّجده .. وقد كان هذا هو السبب الأول لبحث الحفيد العزيز عن معلوماتٍ على الفيس بوك قبل أن يعثر صدفةً على بروفایل جده الأثريّ .. فالصِغار بعد سنواتٍ طويلةٍ من اليوم لن يستمعوا (عمياني كده) لما قام بتأريخه المؤرخون ، هم لن يقعوا في ذلك (الحيص بيص) الذي وقعنا فيه نحن - الأجداد - بخصوص الحكم على أشياء كثيرة من ماضي البلاد لم نرها ولم نعيش أحداثها ، فجيلنا عندما كان يقرأ كتاباً يُمجّد عبد الناصر كان يقف حائراً أمام عشرٍ كتبٍ تهاجمه ، وجيلنا الذي كان يسعد بمقالةٍ تؤيد السادات يغدو تعيساً أمام مائةٍ مقالةٍ تلعنه .. وما بين المؤيد والمعارض ، والمدح والمدام ، اعتباراتٌ لا نعلمها ، وتصفية حسابات ، وأهواءٍ كتّابٍ ومؤرخين .. على أن هذا لن يكون هو الحال في السنوات القادمة .. إذ يكفي لأحفادنا - بدلاً من الاستماع لآراءٍ مشوّشة - أن يُلجّوا إلى الفيس بوك و (يسكرولوا) الماوس ساحبين (بار البراوزر) إلى أسفل ليعودوا عشرات الأعوام للوراء ، إلى حيث يستقر في قاع الفيس بوك مئاتٌ من الفيديوهات والأخبار والصُور التي أرسلت منذ أعوامٍ طويلةٍ و بتواريخها الموثقة لتكشف كيف كان حال البلاد "على الطبيعة" آنذاك .. وأونلاين .. فلا حاجة إلى التصديق التام لكُتبٍ كتبها أشخاصٌ يلمعون فيها أشخاصاً آخرين ، أو يفترون عليهم ، أو يمحوون أحداثاً من التاريخ ، أو يضيفون أخرى ، أو حتى يجملون ثلاثة .. فكل شيءٍ موثّق ويحكي عن هذا الزمان .. بل وعنك و عنّا نحن الأجداد أنفسنا .. ولذا لن تجدي نفعاً تلك الحكايات التي يقصها أبنائك لأحفادك عن بطولاتك الثورية إذا ما عشر هؤلاء الأحفاد على بروفايلك الشخصي ووجدوا أنك لم تكن ذلك البطل الثائر أبداً كما في الحكايات التي يسمعونها ، بل يبدو - من بوستاتك وتعليقاتك - أنك كنت وغداً فلولياً ، أو منديساً خائناً ، أو بلطجياً لا دين له ، أو حتى أحد أفراد حزب الكنية .. و ما هي الفائدة عندما يجمع أحد المسؤولين مثقفي البلاد جميعهم لتلميع سيرته - المشوّبة بالقييل والقال - إذا ما عشر أحفاده على صفحةٍ عمرها أكثرُ من مائةٍ عامٍ تحاول أن تجمع مليون توقيع للعن سلسفيل أبوه !! .. ولن يكون هناك ما هو (أنيل وأفضح) من أن تقف ذريته حائرةً - بعد السنين الطويلة من رحيله - أمام فيديو يصفع فيه مواطناً أو يُعذب ثائراً أو أن عدالته التي يعرفها هي وضع خازوق ساخن في مؤخرات معارضيه . و لذا - وفي لحظة كتابة هذه السطور - لا أجد أحداً أكثر سداجةً من مبارك ومعاونوه الذي يسعون جاهدين لكتابة مذكراتهم قبل مماتهم لتلميع ما شابه الزمان من سيرتهم ، فالتاريخ لم يعد مطاطاً ليستوعب المزيد من كذبهم إذا يكفي

لأحفادنا - وأحفاد مبارك أنفسهم - أن يصدقوا أن مبارك ليس هو الأب الفاضل والبطل المظلوم كما يقول المشرف على كتابة المذكرات في إحدى الصحف، يكفي لهؤلاء الأحفاد فقط أن ينبشوا في مقبرة الفيس بوك وأن (يسكروا الماوس) عائدتين أعواماً للوراء ليجدوا عشرات الصفحات والفيديوهات والإحصائيات والأخبار تلعن مبارك وأولاده ومعاونيه ووزراءه و زبانيته لعنةً أبدية لا تفارقهم أبداً بل و ليعودوا - هؤلاء الأحفاد - (بالماس) أيضاً إلى يوم 24 يناير 2011 في كل الصفحات المعارضة .. ليعرفوا لماذا قامت الثورة ..

سنرحل جميعاً وستبقى أخبارنا وأخبار ثورتنا وأخبار جلاديننا (تشير عالفيس بوك) إلى أبد الآبدين ، ولك الحق في أن تبدو كما تريد أن تكون لأحفادك الذي سيعشرون على بروفايلك الأثري بعد عشرات السنين ، إن كنت حسن السمعة فليكن ، وإن كنت سيئها فتأكد أنك قمت بإيقاف الأكونت الخاص بك قبل رحيلك ، وحذفت كل التاج (اللي اتعملك) و انتزعت كل ما يمت لك بصلة بعالم الفيس بوك وبالإنترن ، ولكن ثق أنك ستكون سعيداً في عالمك الآخر إذا ما قام أحد أحفادك بطباعة صورة لك عمرها أكثر من مائة عامٍ وأنت بميدان التحرير ليتفاخر بها أمام أقرانه اللذين قد يشككون في تقاعسك أيام الثورة زاعمين أنك كنت في الحمام ساعتها .. أو كنت بس نازل تتصور جنب الدبابة .. وثق أنك ستصير أسعد وأسعد إذا ما جعلت بروفايلك - بابليك - public كي يتسنى لحفيدك إن عشر عليه أن يعرف أدق التفاصيل عنك وعن حياتك وعن أماكن ذهبت إليها و لم يعد لها وجودٌ في زمانه هذا ، و ربما بقليلٍ من الجهد قد يعثر حفيدك على البوست الذي أعلنت فيه زواجك من جدته فيضغط لايك و يبارك لكما زواجكما بعد أكثر من مائة عامٍ من رحيلكما .. ولربما ساقته فطرته النقيّة لأن يرسل إليك عن طيب خاطر و صفاء نيه (فريند ريكوسيت) وهو يعلم تمام العلم أنك كنت تتمنى لو أن تكون موجوداً هذه اللحظة - فقط - لتقبل طلبه هذا ..

175 قرش

من كتاب فيها لا مؤاخذه حاجه حلوة



امبارح جبت خط موبايل جديد و اتحال خطي القديم إلى المعاش بعد 12 سنة خدمة في فودافون .. الخط القديم كان معايا من سنة "99" ومحفور عليه كلمة "كليك" قبل ما تبقى فودافون .. ليا معاه قصص و ذكريات وحكايات .. لسه فاكر فرحتي بمكالمات العيد و رسايل رمضان وشم النسيم و الهابي نيو بير وبرضه فاكر حسرتي بالفالانتاين اللي موبايلي فيه بيبقى جثة هامده مبتستقبلش ولا رساله ولا اتصال ولا رنه من أيتها مزة على ظهر الكوكب ويبقى محطوط زي مريض البنكرياس عالقومودينو عشان يفكرني كل أبص له إني عمري ما عرفت أنشي في حياتي غير أمي و أم عاطف الشغاله و مرات البواب لما بتمسح السلم ، كنت ساعتها بدعي وأقول اوعدنا يا رب ، وأفتكر بعدها إن الدعوة اتحققت في أول قصة حب عشتها بالخط ده لما واحده بعنت لي SMS و قالت لي إنها تعرفني من فترة و معجبة بيا عشان أنا "محترم وكبوت و بحط برفان تركيب بيدوخ اسمه ليالي الحلمية" ، فرحت قوي وفضلت عايش معاها أحلى لامور لمدة 6 شهور تقريباً - وبالمسدجات بس - لحد ما قررت في يوم إني أكلمها وأصارحها بمشاعري فاكتشفت في الآخر إنها واحد صاحبي حيوان بيشتغلني .. ساعتها هزأته تهزيء السنين و حمدت ربنا إنه ألهمني إني أتكلم في التلفون واكشفه وإلا كان الخداع هiestمر و الحب هiestمر وممكن ألاقيني متجوزه ومخلفين سوا ست عيال من غير ما آخذ بالي ..

الحمد لله ربنا بيستر برضه ..

وفاكر برضه إنه زمان كانت الدقيقة بـ 175 قرش .. وده كان سعر عالي قوي ولا يناسب متطلبات المواطن المصري الرغاي .. عشان كده نادراً ما كنت تلاقي حد بيكلم حد .. كله حاطط موبايله في جيبه ومبيطلعوش إلا عشان يغير نغمات بتهوفن و موتسارت أو يلعب سنك أو يحطه عالطرابيزة ويشوفه بيتحرك تحت تأثير الفيبراشن .. الناس كانت معفنه قوي قوي - ولا تزال بصراحه - وأنا كنت من المعفنين دول منكرش .. وافتكر إني لما كنت بيقى في ميكروباص وموبايل حد من الركاب يرن كان يصمم إنه يخليه يرن يومين عشان أم المكروباص كله يسمع أم النغمة قبل ما يتعطف علينا و يرد على أم الموبايل ..

ومع رده بنلاقي صوته بيعلي بالسلام .. "وأنت فين" و "عامل ايه" و "سامح اللي نهب الفلوس" و "تامر اللي اتجوز محمود" و "سلوى اللي خانت فايزة" و "فايزة اللي مبقتش عايزة" و "فاضلي نص ساعه وأبقى عندك" .. والصوت لازم يبقى عالي قوي قوي عشان يخلي كل الميكروباصات اللي جنبينا تسمع فتعرف قد ايه أنه راجل مميز لدرجة إنه فيه واحد ضحى بـ 175 قرش عشان يكلمه وده إن دل على شيء فإنما يدل على مكانته في المجتمع بصفه عامة و في ميكروباص (الطالبية - بولاق) بصفه خاصة

وافتكر إنه لأن الـ 175 قرش كانوا كثير كانت الناس مقضياها ميسدات .. و الميسد ساعتها كان له معني كبير قوي و بمقام مكاملة .. الميسد كان معناه صباح الخير ، ومساء الخير ، وتصبح على خير ، ووحشتني ، وأنت في بالي ، وبحبك قوي ، وهات بوسه ياض، ولازم تصلح غلظتك ، وكل المعاني الجميلة اللي بتخليك تفضل محافظ على علاقتك بالآخرين بدون ما تخسر الـ 175 قرش في نفس ذات الوقت .. و عشان كده كان التحدي الأبدى للشخص الرانن إنه يرن قبل ما المرنون عليه يتهور ويلبسه الدقيقة .. و أنا بالنسبة لي كان اصعب شعور لما أرن لحد وأقفل وبعدين آجي ابص عالشاشة ألاقها ..

01 : 00 : 00

ساعتها بعرف إنه الحيوان اللي بديله ميسد فتح عليا ولبسني أم 175 قرش وغالباً بكلمه بعدها لمدة 10 دقائق أهزأ اللي جابوه إنه ازاي يفتح عليا ..

بالنسبة لي محدش كان يستاهل إني أضيع شوية دقائق عشان اسمع صوته و رغيه - خصوصاً إنه كل دقيقه بـ 175 قرش زي ما قلت .. حتى البنت اللي كنت معجب بيها معرضتش عليها الجواز إلا بعد 8 سنين لما الدقيقة نزلت لـ 20 قرش ومفاتحتهاش في تفاصيل الجواز إلا لما فودافون نزلت الخمسين رسالة هدية عشان آخذ راحتي في الكلام ولكن للأسف كل شيء اتفشكّل لأن الرسائل خلصت قبل ما نحدد معاد قراية الفاتحة وتلبيس الشبكة واللذي منه .. وأفكر إني لما كنت بتصل بحد للأسف مكنتش بركز في المكاملة قوي لأنني كل خمس ثواني كنت برفع الموبايل من على ودني وأبص في الوقت عالشاشة واشوف دخلت في الدقيقة الثانية ولا لأ ..

وفي الثانية 50 كنت بكروت الكلام بسرعة زي الديك الشركسي عشان المكالمة تخلص بالظبط
على الثانية 59 ولو دخلت في الدقيقه الثانيه كنت ببهدل اللي بكلمه شتيمه بعدين بقوله يرغي
اي رغي عشان نملا بيه الدقيقه الثانيه اللي حرام نضيعها ونرمي 175 قرش في الأرض ..

والله كانت أيام جميلة وحلوة وكلها بركه وخير و رصيد .. ويشكركم إنكم سمحتولي إني
أشارككم خواطري العابرة عن خط موبايلي القديم .. أكيد مقدرين حالتي النفسية .. هحط رقم
موبايلي عالبيدج والبروفایل للتواصل وأنا عموماً برد على كل النمر اللي بتجيلي .. وده بالنسبه
للبنات .. أما الولاد فممكن يضيفوني عالفييس عشان مبردش على نمر غريبه .. وفي انتظاركم 😊

أنواع الستاتس عالفيسبوک

من كتاب فائلة داخلية تتسع لعدة أشخاص



أنواع الاستاتس على الفيس بوك

تعتبر الستاتس من اهم مميزات الفيس بوك .. ولأن الواحد بقاله حوالي 3 سنين عالفيس فيقرا ستاتسات كثير جدا من ناس كثير جدا .. وبجكم خبرتي الضئيله قدرت اقسّم الستاتس اللي بيكتبها البعض إلى عدة أنواع :

ستاتس من نوع : (هسيكوا على ناركو)

ودي ستاتس تحس ان صاحبها عايز ياكل قلم على قفاه عشان يتعدل .. فعلاً .. الستاتس دي ميزتها انها لغز .. متفهمش صاحبها عايز يقول ايه ولا قصده ايه .. يعني مثلاً .. كام واحد فينا لقي ستاتس لواحد من الفريندز كاتب: "بجد حابه تنرفز.. بس انا اخدت قرارى" ..

طب ايه اللي نرفزك وايه القرار؟؟ .. متعرفش .. وتلاقي على الستاتس اللي زي دي سبعين كومت من الفريندز .. ثلاثين كومت منهم علامات استفهام.. وتلاتين علامات تعجب.. والباقي بيحاول بقدر الامكان يستفز الواد يمكن يقول حابه.. وممكن تلاقي في الوسط كومت من فريند لطيف شكله عارف الموضوع بيقول: "مش مشكله .. شوف غيرها يا فوزى ولما تلاقيها كلمني وانا هزبط الباقي" ..طب يشوف ايه ويزبط ايه؟؟؟.. متفهمونا ياجدعان!! .. ولكن في الاخر تلاقي صاحب الستاتس كاتب بعد 100 كومت اتبعته "برضه مقدرش اقول حابه غير حسبي الله ونعم الوكيل" .. وتكرر حدوده الكومنتات تاني .. انت بتقول حسبي الله على ايه؟؟؟.. فيه ايه؟؟؟ .. و في الاخر خالص بتلاقي ان صاحبنا كاتب " يا جماعه متخدوش في بالكو .. ده موضوع شخصى" .. طب طالما هو شخصى فالتنا ليه ع الفيس بوك .. حابه تنرفز..

تحليل شخصية صاحب هذا النوع من الاستاتس :
حمار

زي ما فيه ناس كانت بتعتقد ان الارض مركز الكون .. فيه برضه صنف من الفريندز بيعتقد ان هو نفسه مركز الفيس بوك ومنه بيتفرع كل الفريندز حول العالم .. ستاتس (انا في الحمام دلوقتي) صاحبها بيتوهم وبيتخيل ان الناس بتصحى الصبح .. بتغسل وشها .. تضرب النسكافيه .. ثم تبدأ رحلتها في الدخول على بروفايله الشخصي- .. هو بيتيأله كده .. وبيتخيل ان الناس دي بتشوفه يا ترى عامل ايه؟؟ و احواله ايه؟؟ وكتب ايه؟؟ .. واكل ايه؟؟ وشرب ايه؟؟ وعمل ادد لمين؟؟ .. وعمل كومت على مين؟؟؟؟ .. ولذلك بتلاقي صاحبنا ده بيتحف الناس بكل ما هو جديد في حياته .. هتلاقي دائما الستاتس بتاعته بتتجدد سبعتاشر مرة في اليوم وهتلاقيها زي :

- "النهاردة كان يوم جميل .. انا اتبسبت قوي مع أصحابي .. احب اشكر سُها وثُها ومُها عالوقت اللطيف ده "

- " بجد زهقان اخر حاجه "

- "ابويا طلق امي وقتل حمايا"

- "ادعولي عشان امتحاناتي قريت"

- "انا شلت مادة .. حسبي الله ونعم الوكيل"

- "تواليت الحمام لسه متصلحش .. بس أكيد فيه حل للزئقة دي"

ازاي تميز صاحب هذا النوع من الاستاتس :

صاحب الاستاتس دي هتلاقيه :

1-لاجيء ع الفيس بوك .. صبح ليل وظهر وعصر ومبيقومش خالص ..كل ما تخش تلاقيه عالشات .. وفي الوقت اللي انت مش قادر فيه تلاحق على تلاته او اربعة في الشات هتلاقيه هو بيكلم سبعين واحد اون لابين في نفس اللحظة وبنفس الكفاءة
2-عنده 200 البوم مليونين صور .. صور في كل حته ويغضوا انشطته اليوميه .. البوم صور مع العائله والبوم مع الفريندز .. والبوم مع الفريندز الغالين قوي .. والبوم الرحلات والبوم الرحلات الكوول.. والبوم الخروجات الميه ميه ..والبوم احلى صحاب .. والبوم رحلة شرم الشيخ .. والبوم رحلة العين السخنه.. ده غير اربعتلاف صورة بروفايل بكتشر- كلها شبه بعضها وبنفس الوضعيه بيبدلها سبع مرات في البروفايل كل يوم .. وهتلاقي صور البروفايل بتاعته غالبا هي شرح للستاتسيعني هتلاقي صورة في الجامعه .. صورة تانيه وهو بياكل في الجامعه صورة وهو جوه البيت ..صورة وهو نايم في البيت .. صورة وهو يتليف في البانيو .. صورة وهو لافف الباشكير ..صورة وهو قاعد ع التواليت .. وهكذا ..

3- هتلاقيه مشترك في كل الجروبات اللي طلعت تحت اسم : "اعرف مين يشوف بروفايلك؟".

4- هتلاقي دائما عنده البوم اسمه: just me

كل واحد فينا هيلاتي تلاته او اربعة من الفريندز عنده قمه في الاكتئاب الأزلي .. ميكتبوش حاجه غير القرف والنكد والاحباط .. وتلاتي دايم الستاتس بتاعتهم زي :

" زهقت من كل حاجه .. الحياة بقت مقرفه "

" انا محبط .. زعلان .. مضايق "

" مفيش حاجه نافعه .. هولع في روحي "

صاحب هذا النوع من الاستاتس بيتعامل مع الفيس بوك على انه قعدة كابينه .. يخش يرجع النكد اللي جواه ويطلع يمارس حياته الطبيعيه .. ومش فاهم ليه ..

ازاي تميز صاحب هذا النوع من الاستاتس :

- علطول هتلاقيه حاطط صورة بروفایل دمويه و كئيبة موت ..زي صورة اتنين وقت الغروب بيحضنوا بعض الحضن الاخير والدم مطرطش من جنايهم ومغرق الدنيا وهمه مكملين حضن عادي (ازاي؟ مش قادر اعرف) ..ممكن تلاقيه حاطط صورة شاب امور معندوش اي مشاكل في الحياه غير ان فيه خنجر راشق في صدره وفيه دم نازل ع الارض على شكل قلب كبير (برضه مش فاهم ازاي) ...ممكن تلاقيه حاطط صورة واحد وواحد لابسين اشيك حاجه في الدنيا وحاضنين بعض و جنبهم عصير فرجلو واكل ديلفري ومستنين قطر من بعبيد جي يموتهم سوا

ستاتس (اذا احببت شيئاً بشدة فاتركه .. فان عاد اليك فهو بالتأكيد سيكون بنطلونك)

(اذا احببت شيئاً بشدة فاتركه .. فان عاد اليك فهو ملكك للابد)..

فيه اشاعه بتقول انك لو مكتبتش الستاتس دي مرة او مرتين في حياتك ع الفيس بوك ممكن تفقد الاكونت بتاعك للابد وعمره ما هيرجعك تاني

بس فعلاً مش عارف ايه سر حب الناس الشديد لياها؟؟؟؟ .. كثير قوي بيكتبوها!!!.. هتلاقي تسعين في الميه من الفريندز عندك جه عليهم وقت كانوا كاتبين الاستاتس دي .. و مش عارف ليه دي بالذات دوناً عن حكم وامثال الدنيا كلها؟ .. وايه اللي الناس عماله تفقده ومبيرجعش ولو رجع هتملكه للابد؟؟؟.. ايه سر حب الناس الغريب للستاتس دي؟؟؟ .. بتتكتب كثير.. وليها سبعتاشر جروب .. وسبعمية بايچ .. ومية اكونت .. طب ليه ..

تحليل شخصية صاحب هذا النوع من الاستاتس :
والله فعلاً مش عارف ..

النوع الأخير .. ستاتس (هعقدك في عيشتك يا حيوان) ..

هتلاقي عندك غالباً فريند محترف انه يكتب ستاتس بالانجليزي ومكلكعه التين متفهمش منها حرف .. المشكله ان يبقي فيها كلام مجعلص والمشكله الاكبر انك بتقدر تترجم كل كلمه لوحدها لكن لما تربط الكلام مع بعضه تلاقيه مش راكب .. بس اللي يطمئنك ان فيه ناس قليله عاملين عليها لايك .. عارف لو كتير عاملين لايك يبقى انت لازم تراجع نفسك .. خد كورس كونفرسايشن في الجامعه الامريكية .. او خد تويفل عشان تمتحن وتفهم الاستاتس اللي زي دي .. فيه حل تاني .. اعمل لايك وانت ساكت ولا من شاف ولا من دري وعنك ما فهمت .. او اعمل لصاحبك بلوك عشان ميفكر كرش بجيبك القوية وكله في سبيل انك تخلص من الالم النفسي اللي بتعانيه لما تلاقي هذا النوع المكلكع من الاستاتس ..

كيف تميز صاحب هذا النوع من الاستاتس ..
هتلاقيه غالباً مدارس لغات .. وانت يا حبة عيني .. تعليم مجاني ..

بس خلاص .. مفيش تاني ..

بہنیں خلائق

لو عجبك الكتاب انضم لصفحة المؤلف على فيس بوك
للمقالات الساخرة وقوله كلمتين عالان بوكس بيلوا ريفه لحسن
ده قافل من الدنيا خالص ..

صفحة

فانله داخليه تتسم لعهده أشخاص
أدب ساخر

<http://www.facebook.com/fanila.dakhelia>

ولو عملته Follow على حساب الفيس بوك هينبسط أكثر
(البنات ممكن يعملوا Add علطول)

<http://www.facebook.com/khaled.bauomy1>

ولو اشتريت كنبه هيجبك فوي فوي ..

كتاب : فائلة داخلية تتسع لعدة أشخاص ، مقالات وقصص
ساخرة ، عن دار ليلي (كيان كورب) للنشر والتوزيع ، 2011 .

كتاب : فيها لامؤاخذه حاجه حلوة ، مقالات ساخرة ، عن
دار ليليت للنشر والتوزيع ، 2013.

يمكنك الحصول على الكتب مباشرة عن طريق

مكتبة بابلومانيا بوك ستور

لخدمة التوصيل داخل مصر وخارج مصر

موقع المكتبة

<http://www.facebook.com/BibliomaniaBS>

وتتواجد الكتب أيضاً بالمكتبات المدونة بالموقع أدناه

on.fb.me/UpeaYj

صفحة الكاتب على الجود ريدز

<http://bit.ly/S2zbJG>

صفحة كتاب فأنله داخلية تتسع لعدة أشخاص عالجود ريدز

bit.ly/TXgtD1

صفحة كتاب فيها لا مؤاخذه حابه حلوة عالجود ريدز


bit.ly/W2pwRv

فانلة داخلية تتسع لعدة أشخاص مقالات وقصص ساخرة



- 1 ثورة التكاثيك
- 2 ابتسم يا ابن الكنيية
- 3 فيسبوكك عنوان جاذبيتك
- 4 البنية أبو شغايف
- 5 المسمولون في الأرض
- 6 عند أم تيتي
- 7 عودة إلى زمن الاندرافر البهيل
- 8 أمريكا هي أم الدنيا .. وأم العالم .. وأبو أمك
- 9 بانيو لغردين
- 10 أنواع الاستاتس عالفيس بوك
- 11 لعنة الغارم فايل
- 12 الحقيقة وراء اغلاق الفيس بوك
- 13 أنا و فوزي والداونلووووووودر
- 14 انترنتوا فوبيا
- 15 آلووو .. ادينه الريس
- 16 افتتم الانبوكس يا ريس
- 17 ثائر حشافش حاجة
- 18 انفلونزا المليارات
- 19 معاش الرئيس .. بين الواقع والكيال
- 20 نفسي أشرب فنغفكتينا يا ريس

فيها لا مؤاخذه حاجة حلوة مقالات ساخرة



- 1 أحفادنا الذين سيأتون بعد 150 عاماً .. انبوكس بلين
- 2 في بلاد المصن والبوس
- 3 أنت عيل تمانيناتي
- 4 مسلم ومسيحي ايد واحده .. بتدي بالكومية
- 5 بيقولك معنديش برناحم انتكابي .. وهو عنده جووووووو
- 6 عمي .. ممكن أعض ايد بتتك
- 7 الغلول الذي بداخلي
- 8 الأيادي الكفية التي تعبت بينطلوناتنا
- 9 الفرق بين بروفایل الشاب الكاطب والمتجوز
- 10 أشوف لايكاتك أصدقك أشوف كومنتاتك استعجب
- 11 مطلوب عدد 1 رئيس جمهورية
- 12 فيها - لا مؤاخذه - حاجة حلوة
- 13 175 قرش
- 14 يا عزيزي كلنا مرشحين
- 15 عجلة وليد
- 16 الغابريكاتور 5
- 17 فلولك حش زي بعضها
- 18 هاتي بوسه يا بت
- 19 أنا جايلك عطلول .. بس مسافة الرحلة
- 20 المغيث في طريق مصر اسكندرية الزراعي
- 21 اتبرع ولو ب رقبة ..
- 22 القول التمام في حق الست العام
- 23 أيها المسلم دعني اهمس في أنك : أدعق انت واللي جابوك بجاز
- 24 لِم فتافيتك يا وطن
- 25 عن الآي بان والآي بولغة

لماذا ببليومانيا بوك ستور!؟



في ظل الظروف المنيله يستميه نيله اللي بتمر بيها البلد بتقدملكم مكتبة بابلومانيا بوك ستور خدمة توصيل الكتب للمنازل والمعروفة بخدمة الأنتخه . متقومش من تحت بطانيتك في البرد ده ، ومتقفلش دفايتك في السقعه دي ، ومتغامرش بالنزول في الجو المقنديل ده .. خليك مدفي ومتكلفت والكتاب هيوصلك لحد اوضه نومك ، اتصل ومش هتخسر وأسأل عالكتاب اللي بتجبه ، والتوصيل في خلال 3 أيام لأي مكان في العالم ، ويومين للمحافظات ، و 24 ساعه لو داخل القاهره ، ولو اتاخر عن كده يبقى اعرف انه الي بيوصل الكتاب اندبح في السكه وسنبحت عن آخر يقوم بخدمة التوصيل ..

مكتبة بابلومانيا بوك ستور : ليه تضحي بنفسك لما ممكن تضحي بحياة غيرك ..
شعارنا : انا روحي فداك ..

بابلومانيا بوك ستور : متعه القراءة في الجو اللبس ..

صفحتنا عالفايس بوك : <http://www.facebook.com/BibliomaniaBS>

موقعنا عالإنترنت : <http://www.bibliomaniabs.com>

عن المؤلف ..



– خالد بيومي فحيمي

مواليد يونيو 1982

بكالوريوس هندسة الاتصالات عام 2004

يعمل مهندساً بوزاره البحث العلمي منذ عام 2008

الكتب والإصدارات :

- كتاب : **فانلة داخلية تتسع لعدة أشخاص ، أدب سانمر ، عن دار ليلي (كيان كورج) للنشر والتوزيع ، 2011 .**

- كتاب : **فيها لاهواخذها حابه حلوة ، أدب سانمر ومقالات ، عن دار ليليت للنشر والتوزيع ، 2013.**

- كتاب : **واحد كماله ، مقتطفات سانمر ومقالات ، نشر الكتروني ، 2013.**

له ما يقرب من خمسين قصة مصورة في مجلة (باسم) الصادرة عن مركز الأبحاث والنشر بالملكة العربية السعودية .

له سلسلة قصص مصورة للأطفال والشباب بعنوان (مغامرات تيفة) تصدر عن المؤسسة العربية للنشر والتوزيع .

الجوائز :

- حاصل على عدد من جوائز القصة القصيرة ..
دار العلال - ساقية الصاوي - مسابقة ديوان الثقافية - مسابقة
المسان عبد القدوس الأدبية ..

- حاصل على جائزة أفضل سيناريو في مهرجان سيني جوبائل 2012
للأفلام القصيرة عن فيلم Cart ، المهرجان تهمت رعاية الشركة
العربية للإنتاج والتوزيع السينمائي - إسعاد يونس.

الفهرس

3	مقدمة الكتاب
4	أقوال بتحاول تبقى مأثورة
94	احترس : منقطة رغي
108	ثورة التكاتيك
114	أنا وفوزي والداونلوووودر
126	الجنية أبو شفايف
131	مبروك يا حمدين
135	بس أنا كسفير اتبسطة
140	الأيادي الخفية التي تعبت بنطلوناتنا
145	أحفادنا الذين سيأتون بعد 150 عاماً انبوكس بليز
149	175 قرش
153	أنواع الستاتس عالفيس بوك
163	مقالات كتاب فائلة داخلية تتسع لعدة أشخاص
164	مقالات كتاب فيها لا مؤاخذة حاه حلوة
165	ما هي بيليومانيا بوك ستور ؟
166	عن المؤلف
168	الفهرس



**أول مرة انشر كتاب الكتروني
قتلهم الغلاف الاخير ده بكتب
فيه ايه ؟ ..**

**قالولي حط صورة واحده ليك واكتب
كلام كتبيير حلووو يشجع الناس تقرا
الكتاب**



**أنا اتلخبطت وقمت
حاطط صور كتير ليا
ونسيت اكتب حاجه
عن الكتاب
بس ميضرش .. يمكن
ربنا يرزقنا بنت الحلال**

